



當塗

黃

左田

古今體詩四十六首

蓋辛未一年

辛未正月五日再至澄懷園直廬

三年池館未全荒重掃蠡絲置筆牀負日園丁驚我老營巢林
鵲學人忙京師氣候稍晚園鵲每以正月始為巢慙無元亮斜川興空有羊曇別

聖傷仰見竹椽思往事賞音難覓蔡中郎

失笑今吾尚故吾鏡中鬢髮迴非初肥磽一任爭三蟲朝莫何

曾易兩狙青史功名憑魏丙白頭蹤跡合樵漁家山好在勞神

往誰是當年舊艸廬

門外春風車馬喧宋寥孤負好林園燈花穗落知中夜爆竹聲
多近上元官冷那禁童僕散愁淡怕對子孫言據鞍且復誇輕

壹齋集卷二十三

健西撲淖沲直到源

西巡扈蹕

憶昨行寄張

映漢

方伯太原

憶昨自楚來晉陽時惟十月四野霜傾城冠蓋出遊我故人喜

見金與張金君應琦時官藩司君官臬司筠莊金君字同年復同里君昔民部同

為郎官廳握手大笑樂謂可三載相頡頏君言征裘且勿脫天

寒此地宜壺觴招邀衙齋急命酒次公在昔醒猶狂嚶鳴得友

那能已輟腹易滿誰為量須與玉山自傾倒温柔花旦交扶將

肩輿不省宿何處醒見紅日升西牆那知半載即賦別我留汾

滄君瀟湘是時筠莊頗善噉子敦軀榦方昂藏緬懷清風輒交

憶歲時燕集尤難忘可憐聲華正鼎盛倏忽變易同滄桑人生

聚散本萍梗逝者如此存可傷去冬及瓜我北上君逐汾鴈翻

西翔代飛已分交臂失合并何意西園菊傾困倒廩話未了惜

卽被 命行匆忙猶幸 西巡許扈從幕天席地看清涼三年
之別十日聚截鶴續鳧稍可償惟愁高寒砭肌骨不敢爛醉污
衣裝雲龍上下諒不可彭佺比壽應未央

題李在擊缶圖

三爰箕踞秋樹根濁醪滿貯老瓦盆一爰閉目杯覆面一爰聽
歌手不罇以腹應節鼓且捫一爰借箸擊瓦缶目注舞者背負
孫舞者一巾一禿髮巾者插羽當春幡脛骨裸露如鶉奔笏有
一人弦撥鴟攢眉苦叶歌音繁婦姑牽抱兒語喧弱女寒儉温
柔存陳風秦俗姑勿論一十二人分卑尊一一貌取笑欲言盤
僅蔬菽無雞豚誰投狗骨齧以蹲想當倉廩新穀屯龙不夜吠
月滿邨催租無吏來敲門兒有複襦婦有禪睡足屋角明朝瞰
黃綿醉倒真奇温不知懷葛甯義軒人生至樂惟愚范我不識
字憂亦煩何曾飢餓絕饕餮不異癯飽娛心魂似看三爰髻微
掀芒芒何處君家園欲營此樂非朝昏

扈蹕 西巡奉 勅畫長城嶺圖

縹囊韜筆錦裊硯奉 勅看山畫山面特許先期款段行不比
傳呼畫師賤去年冬自山中來五巒雪霽關門開長城東下勢
斗落如丸走坂頭難回縈紆綫路舉足礙曲曲穿珠蟻成隊惟
防犖确險在前那識幽奇良其背今春扈蹕重躋攀天教覲面
窮孱顏扶輿磅礴不可貌約畧形似惟巖關碧雲澹沲泉琤琤
山靈亦解來逢迎谿桃破靨杏花喜竝入絹素驕春晴圖成三
日再拜上五字 天題邀睿賞朗吟驚定起文殊古雪潛消衆
山響

再至白雲寺

經閣峇崑夜氣清重來猶戀宿桑情澗冰堅厚唬猿絕木葉縱橫臥虎驚一榻爲誰當牖設白雲依舊與蒼平山僧何必曾相識自有烟霞管送迎

管仲姬澄泥小硯

澄泥小硯三寸強吳興夫人之所藏銘詞古篆戊子製子昂時

甫徵爲郎是歲公年三十五玉潤珠明驚世祖曉啓曾經畫遠

山歸思未用歌漁父

趙文敏以至元丙戌被徵丁亥授爲兵部郎中至戊子公時年三十五歲管夫人漁父詞爲皇慶二年

摩挲大雅互分攜

大雅文敏硯見書公年六十矣何日搏成

你我泥濃磨興到瀟湘竹新浴香流餘不谿製作猶存虢州法

珍藏不用琉璃匣玫瑰賦質曉霞明金泥涅槃盤螭活堆鴉鬢

髮墨光妍曾照鷗波人比肩流傳又到觀生閣壁友重逢五百

年人間豈少賢夫婦只有簫鸞是仙偶當壚人作白頭吟詞女

夫難金石久卽今片玉色璘璘想見薰香浣筆人定知什襲貽

孫子仲穆生兒有鳳麟

題指畫鷹

主人使指不使筆萬管不如指有力縱橫如意左右能走者子

晷飛子翼珠簾窈地几硯清意氣所到天機生忽然落紙爲蒼

鷹加毛減肌皆不能宣和贗鼎衆爭購飼養無人諳味漱輕描

淡朽形質非綠鞵華絆丹青舊何如頃刻彈指成顧盼萬里秋

天清中山毛穎喜輟泣從此不憂縛繫筆

澄懷園澹池荷花芟刈盡淨詩以惜之

清風雨洗長空日荷花繞屋開無算曉起鉤簾香滿家閒時對

酒光浮案消受頻年不自奇經行有客同聲讚涼堂已占水晶

官四壁還張雲錦幔頗知人物愧彼都那得綢繆歌此粲不圖

三載去司并雨與荷花解爲難一夕淫霖水入箱幾家池館山
爲岸疏川導滯屬司空馬狗車棲便

平

內翰先是積雨池溢車不能行有誤直者

皆備一級

非宣夏潦暫時通要使秋河百川灌磨鏡難容塵翳留泊

絲先理營麻亂夜靜如聞仙子愁雨餘似有鴛央歎千夫豬鴨
條投泥一雲彩雲吹盡散倉黃粉鏡毀新粧錯落翠盤絕珠貫
錦韞空餘塵土香仙裙皺任兒僮翫花如解語定可憐魚若有
情亦驚竄我時惆悵悟因緣舟載光華極璀璨幾人聽雨到更
闌若箇招涼臨日盱將衰更盛理固然雲霞暫遣玻瓈換不須
懊惱眼中花差喜清涼身不汗好待龍宮湧白蓮四時不落從
君看

秋感十首

小別江鄉一紀餘寢中煙水足菰蘆玉谿剩有名書籍魏野曾

壹齋集卷二十三

四

無宅可圖嘉會因時常省錄衰顏對酒不能朱最憐歡笑和誰
共滿眼兒孫跡轉孤

涼堂四面種芙蓉一榻閒身劣可容苔葉暗封輒縫合簾紋密
印水波重讀書悔未窺袁豹疾惡時猶罵董龍歸興知爲山色
笑秋來畢竟讓渠濃

驂騮早逐穆王遊駿骨千金孰見收一自論詩推鄭綮翻教激
贊到梁邱龍從畫裏真難見鹿覆墮中失易求極目江天波浩
浩不知誰是濟川舟

露坐空庭夜未分銀河耿耿淨纖雲一天星氣涼如此滿耳蟬
聲宗不聞莫學盧仝歌月蝕空傳崔浩解天文愁心欲寫雲山
隔玉塞秋風託鴈羣

讀書經世本同科美玉良金待鍊磨貧笑市瓜惟取大庸憐買

菜祇求多功名黃霸晚猶減才思江淹老若何爲語少年須努
力白頭容易歎蹉跎

別裁偽體記韓歐一代宗風不可求莫被劉幾欺軋茁須妨坐
客會於休琳琅要令千秋鑑藻宋毋驚五鳳樓暇取南華日披
覽淡虞謬種或傳流

朝登聞苑莫平康得意看花有底忙共詆虞山爲浪子我因高
第惜裴郎風雲累牘工何益忠孝焚香願要償果有罪言能報
國不妨容爾牧之狂

土龍芻狗貴因時嘗警何妨任意爲不礙種桐釀馬酒難堪起
宅徙羊碑雲峯變滅須與耳花雨繽紛姑聽之卻怪旁人輒膏
吻那知有客正攢眉

請郡投閒古有之未聞擇職較安危黃金自信能無辱白璧誰
云不可爲郭伋再來爭共話温公未相已羣推選官圖在從君

壹齋集卷二十三 五

擲巨耐人人只療飢

不脫朝衫不閉房登真別有枕中方雪丹儻得偕仙偶碧落依
然頌侍郎鬼笑術精營十一人言心計妙研桑莫嫌舉室清齋
苦家擅吳羹勝道場

題汪立信贈文信國硯硯側題云京湖制置使汪立信

藏下有方寸印文曰文山翁有橢圓印文曰楊氏珍寶
下方爲成化二十三年楊文和公書公文帶錫跋文信
國公片言隻字人得之寶如圭璧况遺像硯耶余未小
子何敢題識卽書公文帶中語以作公像贊謹勸于硯
右背刻公遺像多髯殆後人摹刻者固有乾隆丁巳休
寧程恂題宋少保樞密使文信國公遺像硯明華蓋殿
大學士楊文忠公藏蓋此硯會歸程耳今不書遺像硯
日汪立信贈文信國硯以人重也像則非所本有也今
藏葉東卿志說處

我昔曾題信國琴今又獲見信國硯此硯初非玉帶生背有當

年丞相面芴鏘正隸字廿一成淳十年歲甲戌大書立信贈天祥質實應爲公手筆汪時慷慨有奇謀二策抵地旋歸休想當淋漓擣大筆墨池屈曲蟻蛟蚪江淮再起汪殉節公亦勤王厯閩粵從此悽惶石友知不知倉卒何年別嗚呼建康柴市何從容兩公就義將毋同不敢題識新都公我請易名爲二忠硯兮硯兮誰磨礪但覺篋衍吐氣如長虹

送劉冊之官安嶽

劉君楚才士丁卯余所錄榜發來謁余舉舉有邊幅時余迫西征餞飲苦徵逐未暇與淡談遽別尤湖曲明春禮闈罷寓我以赤牘駢儷學宋人文章頗華縟意欲招之幕謂已返家塾今年取高第蓬瀛望可蹴不圖百里才竟絆千里足使星照吾鄉遙爲鄉人祝賢豪世急需斯民諒蒙福吾鄉與楚鄰規模同越起

壹齋集卷二十三

六

兒時諸父兄守身潔如玉長老冬不裘布衣綿取煥學僮一緇袍二十猶著綠及我觀政歸教授皖歙六諸生相見時楚楚冠裳肅然惟事弦歌未敢問絲竹別來十三年傳聞駭且恧家無中人產糧無三月蓄有酒必徵歌明眸呢華燭懷金趨官衙不畏芴人矚僥倖弋科名其禍流最毒此猶列衣冠下更無檢束詩書束不觀訟牒讀頗熟伺隙挾官長懸鞭不敢扑因之橫里間道路輒以目大都江水分強弱各有族新安朱子鄉閩門尙雍睦甯池半山居廉謹亦齟齬惟廬及鳳穎門狠常不縮得失爭雞蟲陷胸或洞腹穎更多鹽梟結黨走山谷擒之卽傷人案之憚窮鞫曩時文正公屢屢誠司牧維時吏無才懼恐興大獄姑息不數年奸民乃闐宿方今大吏廉瘠土皆化沃蠹賊儻不生庶幾穫嘉穀君家宦三世神明衆所服治譜自有傳請先效

忠告示儉屏聲華戒貪抑童僕任力兼任人以嚴毋以酷忠信
十室存一懲而百勗第種河陽花綏菘柴桑菊如羹治渤海如
文化西蜀農使服田疇士俾知恥辱此邦況多賢毋讓千秋獨
朱邑祀桐鄉合肥頌劉馥任有防溪邨時留壽春犢宣城與滁
州各各著芳躅三年政有成一卷詩可續我老時歸休再覩兒
時俗從君受一塵西疇事所勵

九月五日偕田

嵩年

及兒子

初民少民

登玉皇廟東臺

作

涼秋忽向盡幾日鄰重陽登高苦無地中庭但徬徨兒曹謂城
西古寺臺可望車驅不里許瞥見松柏蒼高閣嘉彌羅赤金笮
文昌青紅填鬼物礮礮驚神光借問新者誰縉紳繼貂璫廟爲
天啓
四年羣閩所建今雷神中尙禱
以闕像近加修葺者殆不悟也邀福取貴仕咄哉真癡狂其東

壹齋集卷二十三

七

時平臺左右森修篁梨桃襍榆柳縱橫不成行原艸耿餘綠林
葉含新霜午熟頭尙科露頂風微涼休沐近五旬鬱居歌慨慷
憑臨一舒嘯四顧何蒼茫卽此是佳節安用茱萸囊呼兒進茗
飲聊以代壺觴

辭文清公硯

硯長四寸許寬三寸背鐫篆七字曰萬里
橋西一艸堂後行書跋云余四人以有事

在蜀因游杜工部浣花溪上之艸堂過遇仙橋憩青羊
宮見茲硯異之遂售以歸仍取子美句志之河津薛瑄
張固李匡羅俊全鑒賞按固江西新喻人官吏科給事
中景泰元年遷大理寺右少卿鎮建昌匡浙江黃巖人
以僉都御史巡撫四川後江西
泰和人官御史景泰中按蜀

昨試河汾士曾過夫子鄉崇祠隔旁縣憑軾未升堂遺集諸孫
贈清名異代香墓田渺何處聞說已全荒

此硯成都得公方游艸堂一時三獬廡同憩在青羊銘背當行
記題名共鑿藏會須攜石友相與薦馨香

司馬溫公與兄子九承議書斲石僅存五十六字葉

志

說上舍琢其背爲硯仍以全文重摹刻石索題

世間異事胡可料司馬家兒不知孝傳家家訓束不觀獨樂淡
衣枉身教甯州赴任有底忙夏縣高堂幾何耄硬差致仕旣不
能卻憫愚頑但嗟悼家書子細十八行恩意殷勤再三告以官
呼姪已稱名紙尾莊書叔光報此碑殘石獲何年琢硯鐫銘聚
所好更覓全文重手摹要爲名場鎮浮燥前年按試到公鄉絕
少雲仍在學校遍求名籍得武童急錄一人奉家廟忠賢後嗣
類不昌況公盛德尤難肖爾時未暇詢芻支僅撮豐碑拜遺貌
我思仕宦爲娛親老何堪違色笑西山日薄意不歡南陔笙
好難成調于今不乏九承議第少公書厲風操願君收硯勿輕
示怕有芻觀訝譏誚

買菊

壺齋集卷二十三

八

出山非爾志入市助人豪未免泥塗辱何妨聲價高一肩秋露
重幾日井巽勞但對陶潛酒休汗單卓螯
節物人爭買家家照眼明何曾愛佳色惟解務虛名茅店酒旗
兩山圍霜日晴幾回幽賞處相對訝前生

憶子卿

竝宅人何處離居今幾年淡燈桑落酒細雨菊花天送子人齊
贅將家上楚船此時無一字知少治裝錢

自遣偶作

白盡髭鬢作大公含飴一笑對西風自慙不識康成面妄想諸
孫學小同

稚齒飢驅到白頭先生不是不風流變童季女緣都薄竟作人

閒許散愁

買鄰買宅說徒然積壁誰分壓倒錢岸上無舟水無屋萍浮人
海十三年

黃山記昔觀雲海足底青雲頭上天山下豈無人望我雲中何
必盡皆仙

會聞說士甘于肉親見元暉共獎成休怪兒曹渾不解卅年前
本未嘗生

雙古戈爲東卿賦

東卿示我雙古戈名之曰瑀曰右軍胡三援四考工法莫辨孰
周孰先秦瑀戈背有銘文四彫鏤夔龍甚精緻欲讀還疑口但
喏我本空疎不識字右軍稍短銘篆小青翠滿身質完好謂是
始皇廿四年尙未銷兵時所舳想當執此乘轅車長弓大箭爲

壹齋集卷二十三

九

前驅捲喉斬馘最精銳銅花古血交模糊從來好古物爭聚送
與東卿好藏奔款識頗煩辭尙功著書要繼劉邈父我作短歌
君莫嘲勸君惟用虎皮包須防半夜光如燭化作雙龍飛出屋
九日兒輩同人陶然亭登高分韻賦詩競以長篇角勝

作此示之

一亭西瞰衆山幽九日城南近可游自古登高須作賦從來名
士善吟秋滕王落筆千言富邠老催租一句留輸與黃花鬥奇
麗笑臨流水獨夷猶

宿燕郊客舍主人趙某榆次田邨人聞余至一時商于
此者爭來問訊感而有作

曾經榆次田邨過不識燕郊抱布嵬一榻偶分眠食地三年慚
說鑿衡精索書墨藩經宵淡爲秣青芻待旦行更有少年前致

謝門閭猶是我題旌

趙祖母某節孝
余曾旌其門

三河道中

五更清溜斷簷牙發白東方見曉霞樹麥最宜秋雨足看山微
礙溼雲遮黃茅屋矮炊烟直紅葉林深酒旆斜此是五年前舊
路新霜重染鬢毛加

初冬澄懷園

去時牽牛花來時黑鳥浴庭前葉幾堆門外水一曲水縮寒不
波木落山滿屋俯仰惜流光誰與愜幽獨微聞簷際禽啾啾亦
來宿

既夕無所營孤衾自爲理一更後椽眠五更先椽起寢魂那得
閒擾擾椽聲裏清歌不暇聽有酒亦空旨惟蒙月娥憐時時照
窗紙

飲酒

壹齋集卷二十三

十

北風生驟寒無事且飲酒初非慕陶公亦匪學犀首今年懷抱
惡失意事八九攢眉過三時何曾笑開口宵來興偶適恰值杯
在手池水綠未冰林葉黃依柳青山露牆頭明月窺簾牖歡然
一觴醉何必石與斗

憶太原城東道院寄山長桑

庭樵

孝廉

高閣入秋甯登臨記昨頻官閒時載酒月上更留賓蒼莽空千
里孤危絕四鄰眼中何處是俯仰跡俱陳
問訊桑維翰皋比坐擁書講堂人去後汾水鴈來初囊有新詩
句門多舊雨車不知經道院曾否一思余

老僧久退院猶復念諸生請業誰精進煩君疏姓名宿桑啗結
習種樹愛陰成回首西山隔蒼烟萬里橫

次韻子卿歲朝圖

擬築堂名歸去來柴門也傍鏡湖開狂吟紫府仙人句醉撥沙
瓶白玉醅山近未須騎兩犢歌清時或聽雙梅不知此願能償
否歲晚懷鄉首重回

卅載雲龍上下俱五年小別雪盈鬢消寒忙苦尋閒樂饋歲夸

張有畫圖隔屋瓊林粲花蕊

子卿時卜居此
鄰除夕日雪

短檠紅燭爛珊瑚

明朝賀正歸來早肯就寒廳共醉無

當塗 黃鉞 左田

古今體詩七十五首 盡壬申一年

壬申元日 太和殿侍班禮成入直雪滑折腰蒙 恩

賜醫恭紀

通明方鵠立退直忽籠鍾自覺趨踰後人疑僂偃恭醫來動鄰里 恩重起衰慵便欲腰鎌去春田狎老農

題吳偉畫冊

次翁筆力殊豪縱憲孝兩朝名特重錦衣百戶畫狀元仁智殿中老供奉圖成一幅綵數端將去毋令酸子鬪妓飲南都傲貴人客必秦淮徇酒甕至今開冊氣淋漓想見濡豪狂縱送我聞工執藝事諫圖寫前賢寓規諷伯時慈孝故實傳和之風雅民

壹齋集卷二十四

一

情貢荒唐漫戲意何取頗類書窗小兒弄渡水方塗墨鬼嬉獲麟忽貌尼山慟寒山拾得怕饒舌牽率樵夫牧兒共志在披圖笑口開不管賢愚類難綜此法流傳有自來子專石格嘗醋權輿宋後來蕭照李餅餠訓成王盤礴大都相伯仲惜哉遭遇值盛明徒費精神嚇愚蠢吳中七子正同時叵耐聰明祇自用快意雖教四座傾鑒藏難入高齋供獨憐名蹟日銷亾剩有零縑亦驚眾當時况自擬仙人酒酣且欲陵飛鳳

題葛明經雲小像

我來京師十三載胸中故人面常在吟肩山聳畫不成林風湖月相思每何期君忽現身來附以高文珠百琲邀我題詩似欲言獨立蒼茫儼如待軀軫依然鶴骨昂鬢髻畧點吳霜確憶昔消寒湖上亭亭畔梅花方破蕾手中杯皺酒鱗鱗月上波光流

浼浼李白狂歌動鬼神元龍意傾湖海無何座客盡凋零聞
說園林今亦改更無巖壑勒移文剩有簷楹傍碑礪也知花發
獨看難終勝車驅終日殆行雲流水意何閒俗狀塵容氣已餒
何時再續歲寒吟風雪填門吾不悔

送李賡 同年守汀州

汀州去國五千里山色當樓紫翠重俗有淳風人買犢灘經春
雨水盤龍禾中麥久雙歧秀李先守嘉興有善政嶺外花看萬樹濃暇想
著書松桂底定知時有客過從謂伊太守秉綬太守郡人也

園居雜興

卷軸隨身曉命車邨夫子又賦移家海棠已謝丁香老開到無
名小艸花

翠葉青莖布水瀕思憑洗擇作廚珍園丁眼與芡蘆熟那識中

壹齋集卷二十四 二

多雉尾蕪

成團柳絮走牆東也得花名入錦叢未必春風愛輕薄故教點
地又飛空

薔薇蘸水色鮮新忽漫飄零委鞠塵懺惱癡兒太無賴折人花
朵贈他人

傍柳依蒲聚釣徒羣貪白小當園蔬從知結網應須早誰是臨
淵不羨魚

有鳥彫籠號白翎啾啾善學百禽鳴可憐鎮日娛人耳得意都
非自己聲

稱意花開惜不多一枝誰解對高歌卻輸蒿艾漫山綠偏在游
人展齒過

幾經風雨染垂楊依舊柔條拂水長莫負主人勤愛惜好留清

蔭覆茅堂

香山

兩足蒸嵐潤林深暖翠重喬柯聳飛閣幽壑遞疏鍾犖確誰通
展蒼茫獨倚筇四山看總好面面玉芙蓉
臥佛庵門近桺羅花正開津梁吾已倦雲水此空來巖月照通
夕邨醪覆滿杯山茨隨分住也自抵樓臺

山月

山月清如此客心悲可知孤寒起天末掩映入雲遲古屋狐狸
拜高樓別婦思姮娥渾不管委照本無私

約子卿游崇效寺嗽素麪

齋廚日蕭索努力飯難加爲我采槐葉從君問棗花題詩紅杏
卷送客碧天鴉捫腹歸途近橫街一里餘

贈龍道州

齊荆

壹齋集卷二十四

三

八歲就外傳卽與君同學君長余一歲髮髦兩鵝角謬爲先生
誇謂是玉一珉六年始離羣歲時見仍數君尋隨伯兄通潞牧

新擢我亦作京游衙齋手重握座客多鄉人吾師最謹慤邵未齊先

宋公才頗豪何意老而瞶近破吏議觀燈往市南門飲擬河

朔卅里車常巾五牖船屐促秋試同儻居戰兢互商摧其時屋

主人滿洲孝廉岳乾隆甲午與君同應京兆試儻居岳公起家時岳方爲孝廉後出撫三吳

治行天下卓報罷各分飛我歸足仍銳君補寫書官被恩最

優渥初看錦城花旋采湘江葍春陵拜漫郎濂谿緬先覺邦人

取大科何編修凌漢刺史昔隴斷至今酤酒壺猶是州民榻君所使令猶道

州今春快合并狂喜欲騰越屈指計睽離拭目歎屯剝一去亦

二年光陰如電霍儻再更幾番壽應媿錢幄辛丑別於京師及今卅二年矣翦

燭黃清醑開飢飯香穉感衰話身世山泉混清濁四十已棄官
六十反蹠踣驚駢被錦幪砭硃強追琢翦翎畜彫籠不如引雛
嚼揚髻向桑山不如戀滌澗宏詞麗班揚那免誚尹啞區區數
卷書何足詡卓犖况復老遺忘才思涸如舉爭似親民官可使
俗返朴我顏醜可憎君貌清堪兒舉世急糞黃何人比管樂成
效業可睹再出更果確岳公近可師流風未脈邈宦成賦歸田
我先具拘攬湖山自清佳春秋偕被濯放杖學兒嬉請與君相
較

四月十九日偕龍笠山田季高及兒輩再游崇效寺時
子卿病不果至

幾日禪房衆綠齊薛蘿濃壓帽簷低何須載酒心方醉寺僧不許載酒
誰是無花手重攜書靜橫琴聊破宗雨餘選竹欲留題荷鋤種

菜吾能辨卻少山僧地一畦

怵苦先期約散愁忽逢小病遲來游人生那得常如鷓我嬾思
閒願學鷗蕉雨無心同結夏菊天有暇或吟秋卻懷湖上精藍
好煮酒羹魚頗自由

貓犬

飢貓日以魚噉狗多與肉非嘉守捕功取以悅吾目貓飽但游
堂狗肥乃善噬主人情嗜偏奴隸怒裂背我亦有室家我亦供
役使奈何彼不如飢寒至于此

五月一日漫興

萱艸去年叢榴花著雨紅光陰疾飛電節物憶鄉風碧柳銀鱗
貫青菘玉糗筍傾城競渡江濶鼓籠銅

新水欲平岸好山如在家翠鬢能倒影紅蕩不須花散直身無

事臨流手自又黃昏誰破宗鼓吹有官蛙
息轍無今雨開編友古人義難爭寢鬼論不到錢神但解啓期
樂何妨原憲貧脫巾時攬鏡一任髮如銀
謀歸拙無計有客笑空談又復過重五惟餘歎再三艸堂賞孰
遭棧豆戀真慙只合從彌勒全家借一龕

鮒魚

鮒魚四月美絕倫荻洲網出光如銀頭魚入市競豪奪漁人以爲頭魚索千錢一尾充廚珍滋味非微人厭若愛護亦自矜霜
鱗誤游漁罟欲速朽義不受辱如成仁畧傷骨體稍齟齬要令
饒吻姑遂巡端陽已過論價賤被絮自典拚家貧大愈忍臭喫
石首況求卽得非猩脣天工特許擅節物海若歲遞來江濱供
人口腹樂鄉土乃爾棄置趨風塵龍祠鰻值牛羊貴保德鯉重

壹齋集卷二十四

五

開河真襄陵龍子祠下鰻最肥美一尾值錢三四千石花魚土人以河水初開得者爲開河魚爲最佳尋常市者多僞

黃花下市肋魚上鯉風壓擔來天津頻年頗下何曾箸乃寢猶

曳荒江綸譬如冠蓋貴游聚何似羈展鄉人親往時山堂曾遠

致油浸差勝糟鮮新往在紫陽書院家人以油浸鮒魚見寄經七日而味不變二十年事偶

根觸三千里寄夫何人他時倘倩介象釣更請兼致于湖蕪湖

土產蕪識者甚少

澄懷直廬卽事

停雲蔭我屋流水環我門松風送隔溪炊烟成一邨放鴨翠蘋

罇釣魚青楊根雖非大三昧卻無塵市喧

閉門晝方長欹枕睡不足寢中聞棗花覺來似蘭馥偃蹇對林

陰參差壓檐綠山鳥時一聲知是桑葢熟

疏簾卷暮色新月升林端悠悠俯逝波肅肅仰歸翰目極故交

盡情爲懷鄉殫浮幻殊自知將心誰爲安

大田待佳雨中宵隱遠雷窗紙乍生白電光時合開蘧蘧已化蝶蕭蕭未迎梅晨興泣花露玳瑁含蚌胎

題趙文敏所藏獨孤蘭亭燬餘殘字爲煦齋司農作

昭陵爾紙定武石南宋後人都不識鑿損搨本元己希又五百

年何可得子固落水攫蛟宮獨孤幾人茶毘空可憐鑿賞松雪

翁收拾餘燼歸司農司農響搨宛然在司農先時響搨趙臨竝跋藏于家故得完好無恙

趙璧獨完有真宰回看翠墨剩幾行零落明珠不成珠吳朋

柯九思跋尾半在亾弄藏名印辨微茫每於爛額焦頭處時露殘

星缺月光撫冊重觀發三歎又與蘭亭作公案後之好事定如

今知復流傳幾人翫世間無物無知音抱殘守闕愛尤深公如

不惜雙南金儷茲尚有震餘琴松雪集有謝鮮于伯幾惠震餘琴詩

池上觀雨

壹齋集卷二十四

六

牆陰人跡稀一雨苔葉綠坐茲池上閒送我林際矚戩翼鳥急投翻波鴨爭浴物情取舍殊人意清涼足車馬寂無聲儵然遠塵俗

偶成

百無可樂只詩歌盡日垂簾對綠波補種池荷抽葉小自生石竹作花多魚通活水游頻躍蟬試新聲澀未和不必閉門嗔剝啄疏慵那有客經過

題法時帆前輩篁石小像

瀨嵌聲瓏玲下漱清瑤流瀟碧足烟雨中憶茅堂幽高人悅青山抽簪未白頭懿茲猗猗姿儷彼落落儔理或鬱紆繞節自攄森修三分水周屋萬卷書滿樓鷓鴣籬可樂飢棟實行自求況聞

經濟道頗切蒼生謀賦詩特餘事抗論驚浮游泉石寓意耳襟抱知公不

題石刻牟子才高力士脫鞵圖

圖在太平府學尊經閣下為元太平路經歷子

才七世孫景陽刻

天寶寶祐羣閣肆以唐較宋彼善此就中碎得百宋臣爭敵力士一腳指阿瞞五十年天子微高將軍幾兵歛巫州晚節殊從容小了織人見應恥宋時勁敵在淮蜀臨安土木方興築奪民田共畏閻羅易疏君猶眯人目存安丹青想偶然風流企慕貌鄉賢子才號存安庸奴不量謂譏已爾時誰足當青蓮青蓮此舉亦無謂戰國縱橫餘習氣君前那得逞酒狂眼中尙未忘權貴牟君頗有諫諍姿閻馬丁當甯不知何不上書數其辜效文天祥乞斬之畫圖召禍國何益五百年來汗此石

壹齋集卷二十四

七

題沈石田畫卷

睡鄉午枕甘若蔗癯據胡牀坐幽榭美人一笛起清風滿隴涼雲不知夏醒來白袷汗翻漿客送青山卷插架揩摩老眼隱几看淋漓健筆驚人乍絕幃淡谿艸閣寒道書茗椀高人暇落澗如聞泉活束過橋似有驢歐歎蹴水田禽浪作梯穿雲松蓋陰當舍此景江南何地無到處蒲帆我曾卸一灣新漲足魚鰕十畝濃陰富桑柘雨晴野艇放鴨還耕餘黃犢從兒跨籬花爛漫任開落邨酒甘酸互邀迓盧堂儻許十志成陸裝不費千金價眼中了了未暫忘醉後惺惺常自罵癡兒畏學昨已逃老女凝妝晚猶嫁卷圖淡婉意蹉跎撫膺那禁心悲咤驪卽無家終必歸舒況非才早應罷殷勤爲問石田翁畫裏林園可容借

子卿改官御史詩以簡之

南臺東觀秩雙清經濟端由學術精好為蒼生陳利病休將白
簡擅威名澄波終異湍流激鷹隼何如鳳鳥鳴暇取青箱徵故
事能言須要世能行

次韻補題子卿古香精舍看花懷人圖

圖為余作

有梅不看畫于紙如貌真真呼不起燕市無梅強索看笑倒鐵

佛空山裏

圓照寺俗呼鐵佛寺古香精舍種梅處

空山花開喜子旋花枝待子神

為傳卻呼明月發清嘯憐我瘦骨如癯仙我今蹉跎又十年畫

圖已暗詩缺然

圖為癸亥作及今剛十年

溪橋邨路春猶記月落參橫寢少

緣天寒欲雪寺門靜精舍無人古香冷繁枝健步不可移湖月

林風意誰領山人還山非所難奮飛幾欲從風搏只愁我去君

仍住孤負江梅盟要寒

亢勳過郊園辭歸崢嶸

壹齋集卷二十四

八

小別無端見素衣郊園過訪重嗟歎子才在晉稱難得我老懷
鄉久欲歸得意會看鵬怒徒相思惟望鴈來飛也知聚散搏沙
似巨耐羊求次第違

時田季高亦欲歸省

題蕭尺木摹元孫

巨源畫

並引

圖繪寶鑑載元孫君澤杭人工山水人物學馬遠夏珪

近見蕭尺木畫跋云宋元間有孫君澤名巨源作畫以

枯淡為渙厚倪黃常宗之余見其蹟吮筆貌之以明古

人所學之博與圖繪寶鑑異蕭君好古精鑑必非妄言

因題一絕以俟後之見孫畫者評隲焉

姓名偶慕宋孫洙畫本流傳百載無不是蕭君曾眼見幾將馬

夏混癡迂

書王黃州鹽池詩後

並引

石刻在今解州署其序曰鹽池之大古無題者有唐都
長安河中爲近輔池實屬焉古人奇士游者多矣還都
建郡以來亦在千里之內凡所臨莅率皆儒臣未有一
詞以紀勝槩天實惠我使之補亾淳化四年禹偁自商
洛移於解梁游覽之餘憤然成章章三十六句雖不虞
於前輩豈敢誣於後生人或繼之實自予始按昔鹽見
周禮晉寶見左傳說文水經皆有箋詁不可謂古無題
者郭景純鹽池賦柳子厚晉問累數百言更不得謂無
一詞以紀勝槩蓋是時書多手寫不似今人翻檢便易
耳然小畜集不載此詩殆亦悟而刪之也

積雪飛霜中古留庵盛還藉老僧收

黃州詩庵盛更覆篔以屋貯鹽謂之庵至今猶然泊

畦之夫號曰和尚不知始於何時

當時也欲題詩句爲有先生在上頭

壹齋集卷二十四

九

先生豈是腹空疏傳寫時多未刻書一自巾箱供獮祭翻教插
架飽蟬魚

葉編修

紹本

用蔗字韻作詩見贈次韻奉酬

宦味淡于已歷蔗歸翼誰爲送王榭暫息閒身燕已秋難語冰
心蟲尙夏西鄰翰林揚馬儔徐陵筆硯珊瑚架冰雪遺人一卷
清珠璣照我雙眸乍偶題舊畫石田筆蒙和新篇玉堂暇竟有
高人嗜歛痴何怪仲宣好歐歐竭來僦直囷守瓜偶一還家犬
驚舍 豹尾三秋畋未從雞棲幾日車剛卸人稱巷善接青楊
我愛門陰有文柘數武過從豈惜勞一句戶樞何曾跨書箋畫
卷委縱橫俗狀塵容要迎迓偷閒斷續和詩篇畏飲尋常忘酒
價避客思從汗漫游絕交一任山王罵未必虛名身後傳何須
代作他人嫁以蚓投魚知自慙將埜陵山得母吃齏瓜抓棗聚

尙能秋清月好吟難罷但愁腹儉乞饋貧異書莫憚東家借

再次前韻答筠潭

我官側出類都蔗凡材難構瀛洲榭若將文字比丹青差可麤
疏儕馬夏爾來但欲保封疆遇敵遠巡費凌架鐻下霜髭旋復
生寢中匹錦徵還乍每慚老去溷欲無那有興來嬾不暇頻年
看柱作棟梁幾度驅車聽欵欵幸依王翰結比鄰不啻相如與
同舍白鶴新茱早歲文白鶴山房詩鈔四卷君未通籍時作也金環久攬高軒卸

揆穴先揆驪頷珠挽強必挽烏號柘屬者輶軒到閩越富哉海

朱竹君石君兩先生皆曾任福建學政

緊予三晉亦抗顏僅

嶠雄含跨荔子輕紅按譜嘗武夷濃翠沿溪迓藥籠參苓已竝

收聲名竹石應同價

免諸生相聚罵得代同爲垂橐歸舊交見異無媒嫁小山叢桂

暫淹留子虛雲癡姑從詫買鄰千萬洵不孤隔屋再三酬未罷

一枝斗憶故鄉棲但恨鷓鴣不肯借

三次前韻答筠潭

壹齋集卷二十四

十

君詩境妙倒瞰蔗勝陟層臺游曲榭非徒戶萬與門千能起雷

冬造冰夏我詩陋淺若繩樞又苦徵求稅閒架打頭剛救雨風

侵彈指忽看樓閣乍呻吟被底那能奇應接山陰真不暇惜學

常愁誤讀電有詁無徵難押廣雅釋詁歌極也衰遲可笑不

自量重繭安思過百舍如遭債責法當償似負馱行勢難卸因

思智力譬檠弓要取良材須七柘勇哉不厭李陽拳怯耳甘出

淮陰跨僂當把筆侍聯吟從此掃門遠相迓涼宵好雨報新晴

明月清風正無價牆根幾日花破顏馭者九衢車不罵方喜主

人吟有歡卻愁禦寇行將嫁鼓衰而竭惟自知鏡照不疲從衆

詫會當大扣鑿華鐘一洗啾嘈繁響罷第虞腕脫姑徐徐十手

傳鈔應許借

題雅宜山人像

五憶歌成序已秋桂叢山曲好攀留山人有五憶歌為嘉靖丙戌夏避暑作今有刻石

聲名豈僅書家傳風貌殊非隱者流就學九峯淹歲月謂蔡九遠忘

年北海訂交游謂文徵仲到今形韻猶如活莫惜先生未白頭

蕪湖會館有明泰昌元年縣人周應銓所書土地神牌

為作此詩

泰昌帝泰昌年號僅分系誰其存者有土地詔改泰昌在明年

明年卻是天啓元八月以後臘月前泰昌之號虛屬焉紅丸訟

移宮闈土地洵洵亦搖動天跳地踔知何年賴有艸莽臣應銓

還我土地書特筆泰昌元年十月廿一日

題倪高士像

壹齋集卷二十四 十一

書畫神仙惟漫興園林高士類苑寒得兼眾美真奇福盡棄家

貨益大難愛潔佟之何礙癖高名太尉不能官放還老鐵仍多

事爭似湖山自在看

葉筠潭招同蔡學士之定汪儀部梅鼎王侍御澤蔣編

修詩集飲玲瓏山館筠潭五疊前韻見示次韻奉答

對杖屨經三中蔗軍實重思講於榭榭講武堂見左成十七年注又楚語榭不過講軍實

焉忽枉芳筵為買春起攬綸衣尙宜夏次第明簪盍五人虛明

書屋開三架半屬同鄉情最親況是比鄰見非乍插架書鈔善

本多題名碑揚游山暇壁縣李陽冰鳥石山般若臺銘榻本用僻何人為考錫借

極有例當要歎東坡次韻程正輔游白水山詩細鬪黃土栽三

惠州無書不見此字極自注正輔分人參歸種韶陽來詩本用極字二訓其一人未曾經用欲援東坡例改押他字杯行到手未

初更月好當頭剛入舍憶昔餘杭酒數沽扁舟茗雲帆三卸八

月濤聲雪撼山三春鶯箔桑多柘白嶽黃山我熟游梅林黑衛

閒會跨

儀部居休寧梅林乾隆辛亥夏曾一過訪當時頗切聞聲思今日頻蒙倒屣

迓容臺翰墨妙通禪羣玉圖書美無價張籍窮龐安足收徐凝

惡詩僅可罵自笑于思棄復來人嗤鄰女貞還嫁坡調山谷偶

游戲雄似相如敢相詫戰經三北豈能軍棋饒四路應須罷他

時石鼓許再睿懸河辨口從君借

次韻題畫

吹雲非筆畫濡髮非手書偶爾逞奇快未必無煩挈拙工範廣
鼎蝟焉載專車濃青閒古綠貌澤中無餘高人不學畫吮豪娛
獨居自然具氣韻望而知璠璣董巨非天人何獨卑視余曷不
少矜慎落筆稍踟躕隨人寄逆旅何者爲吾廬况復襟客氣幽
懷安得攄今人吾不薄古人吾不如

壹齋集卷二十四

七

題董文恪公山水小卷

宋元畫派誰中分權輿斷自荆蠻民力掃縱橫變古法獨以幽
澹還天真癡翁阿蒙不滿意閒於畫跋搖譏唇悠然謂得荆關
意趙

松雪高房山

以下非其倫當時學者趨簡易但愛麤貌遺

精神江南人家有無判清俗鷹鼎襍出耳鑿尤紛紛遂使唐宋

遺法昧謬以疏簡爲清新那知迂也早從董巨入拍塞滿紙殊

多皴倪黃固是一合相譬彼無著偕天親東山先生法清閔雄

偉時參大癡意長卷巨軸見已多此是南齋小游戲南齋

在昔推麓臺山紅澗碧天骨開不生不熟致高曠親見浮嵐暖

翠來先生健筆真後勁一代倪黃在宮禁不須譜史後來傳

領取當前自論定余生也晚殊可憐雲烟過眼空茫然風流事

事都非昔豈僅丹青遠遜前

病起偶書次子卿綠山書屋韻

安仁謬賦閒龜蒙激歌散三徑無松菊一尊欠容滿臥驚水潑
衾起聽雨鳴繳我憂僅采薪世醫絕和緩參苓若沃虛肺腑不
相管周妻老已疏何肉病又斷遂使淹再旬汗澤垢羞袒佳節
迫重陽頽年去難纂并梧葉未凋籬菊花猶短江亭臺可登蕭
寺門誰款豪憶曲江游醉失高陽伴午倦香一爐夜諷鐙一椀
龍鍾百事拋惟有吟不懶拈鬚一鑿容此翁見殊罕

子卿約重九日游崇效寺先以詩招次韻答之

消渴笑相如養生陋中散人壽能幾何百年恆不滿我其內熱
與未要清涼繳頭圍日以削腰帶日以緩秉燭游且遲何物病
能管比鄰有佳招憐我輒跡斷重陽扣棗花素食就髡袒春至
花枝枝秋來實纂纂老覺日月忙歸終計慮短已拚腰脚頑但

壹齋集卷二十四

三

恐風雨款卅年幾登高零落不成伴呼兒理琴囊戒僕載酒椀
病餘曉貪眠失旦似雞嬾先期膏吾車早出月來早老翁難早出杜九日

也句

九日崇效寺看菊子卿三疊前韻見示復和此篇

腰脚病兩旬痺頑今始散骨瘦如青山坑谷秋填滿朝晴風日
和障面不須繳招邀佛寺游轆轤巾車緩我年迫趨公睡屬雞
聲管元遺山詩幾時不屬雞聲管睡徹東窗日影偏病因閒卻來愁如水難斷何似鉏

菜翁息陰方露袒入門菊作花名品日增纂過頭藤杖高扶闌
鳧脰短路生花徑紆游熟僧意款為語霜枝翳正少吟身伴清
心琴一揮破悶茶七椀得茲半日間翻悔出門嬾君看菊落英
我又烏黏罕

九日與子卿季高暨兒子初民少民以陶詩舉俗愛其

名爲韻分賦節物得舉字咏酒

古人采菊花和葉釀以黍甕藏到明年飲之成美酒今花古所無古風今不舉提壺入市酌亦復歌有莫歡然適有餘弦月照尊俎

烏程縣以名索郎思旅語淵明有名酒未審名何許京師重越州踰越江河阻四時朋盍簪十錢杯一舉又復恣淋漓偷飲到童監何如五斗米邨釀白於乳醉倒東籬菊不知孰賓主

子卿得其字咏餠同作

獵獵西風飈彩旗餠香自否競嘗其名因九日登高錫象取遙峯任意爲重陽餠一名峯餠見王文格姑蘇志炙手癡兒喧繞市驚心旅客怕題詩休欺湫隘餠坊小中有星郎正養資

藺溝

壺齋集卷二十四

古

中宵猛雨洗浮塵老綠焜黃著眼新散水畧如孫位筆好山都作李唐皴登車攬轡輸行客倚樹看雲羨野人載取一尊何處醉冷吟閒作畫圖身

順義道中望王家峪山腳一帶柿林葉殷紅如晚霞一

片戲占一絕

不圖烏柏擁柴門嬾寫丹楓傍水村別樣秋山紅樹本燕支一

抹染雲根

宿北石槽邨居主人李姓順義縣三十年老諸生也感

而賦此

南石槽北山邨居門前榆柳秋蕭疎三間茅屋窗新糊爲堂爲室爲庖廚柴烟土鏗鬱不舒化作天際烏雲烏主翁鬢髯多白鬚云是識字耕田夫卅年前顧一腐儒不知何地安詩書屋邊

田僅二頃餘困有積粟廩有驢閉門終歲無官符繫我出入承
明廬僕馬導從繁有徒年來學殖荒落無名雖翰林實則誣爲
憶弱冠入學初與翁之年應不殊我爲朝士翁泥塗幸與不幸
非賢愚若爲計較誰憂娛我歸難覓粥一盂翁自有田犂可扶
吁嗟此翁我不如

次密雲縣

靈轟電掣五更頭傷午濃雲始盡收天外峯巒臨紫塞眼中城
郭見檀州秋淡老樹仍留葉人怯新寒乍擁裘筋力今年重勞
頓役車只合早歸休

感事

鞭撻蛾眉作馬牛萬金不惜等閒休儻無漢法三章約定是王
敦一輩流重買崔盧壯門戶劇憐倚頓易黔婁莫疑此禍真無

壹齋集卷二十四

五

矣天道由來祇自求

古人風義友兼師豈效飛蚊聚一時縱酒便教汗李白狎邪祇
辦作溫歧冀光宵燭曾分我援手寒泉卻是誰爭及秦青歌一
曲行雲不動暗塵吹

演雅

水弩含沙巧伺人可憐無目枉呈身狡蟲合竝尸蟲罵周狗何
如弄狗親貓鬼頗能司禍福蟲蠶豈僅攝金銀會須和氣除妖
矣郊椒游翔盡鳳麟

十月朔日自西苑冒雨入城

柳陌槐街綠自腴今年妍暖未開爐不知江店茅柴酒黃糯蒸
來熟也無

蝶老霜濃尙鬥花枝枝豔豔竹籬斜誰憐冒雨西園客三尺泥

淡正沒車

初冬

黃葉林閒屋數閒平橋寒水綠纒環一年又到初冬候十載曾
消幾日閒眼底儘能容俗物窗中不厭只青山愁心向晚渾無
著坐對孤雲自在還

葉山舊居湖上榜曰小林屋水際木芙蓉最盛今移居

近十年不知此閒尙有存者否十四年不見此花漫憶

成此

憶昔小林屋芙蓉似錦城盈盈隔秋水葉葉有風聲色竝雲霞
麗人來几硯清不知堤柳下猶復向時榮

米窩兒酒

竝引

京師市中白酒舖每歲冬初以白布長丈餘爲帘大書

壹齋集卷二十四

去

徽州米窩兒酒其實他郡皆善釀不必徽州也近亦祇

書江米窩兒酒余飲他酒輒病惟此差適因爲此詩

槐街葉落天宇曠瞥見泉紳風裏颺馬上人驚灑面涼回頭笑

是酒家望大書白酒米窩兒云仿吾鄉歙州釀尋常大戶棄不

嘗方便病夫飲無恙此酒江南到處酤方法童時看未忘甑蒸

黃糯半温涼手和卉藥投罌裳中留一井若淡泓外圍輒艸當

屏障不寒不熱報漿來且溢且醞類春漲甜如蜜汁白如滫飢

能輒飽寒能湯年來冬近輒思飲每把淡杯懷不暢憶昔蕭齋

賞蠟梅正值新篳纔撇醕一夕真傾三百杯葛疆酒膽殊豪放

乾隆癸卯冬同葛冬部飲蕭春園蜜香艸堂賞
黃梅花一夕盡七十餘斤糞爲之馨卽此酒也故人化去我衰

頽眼底酒兵誰可將濁賢清聖皆不中惟有此觴差可詎何時

東老結比鄰重見飛空仙過訪事見清
異錄乞取靈丹救病身使我

桃花顏再壯一鼓長鯨吸百川寒梅寢裏香盈帳

糖燭栗

燭栗傳李和權輿自北宋放翁筆記之實寓故都慟其法昔未聞加糖今所用范陽產最良易州小不蟲秋風八月零驢背千筐送摹形雞頭圓刺手蝟毛痛泥竈當街支茅柴帶烟烘靈砂互襍糝長鋏恣斂弄黏竊褐未碾焯焯黃裂縫熟無大小殊甜微中盪共倉卒佐酒筵飢虛充飯糗口吐熱客饜脣沸饒兒鬪爭市趁歌臺擅名據胡術糖燭栗向以王皮胡術為最丙夜燈尙懸一裹懷不凍我家近宣州饋遺親知重顆顆大于拳一一包可貢消寒炮地爐飮盤伴宵誦誦涎垂通子貪手撰孟光供清境記不怠餘味甘猶寢卽此未全貧何須戀微俸

題龍笠衫小像卽送之象州

壺齋集卷二十四

七

一別八千里相逢卅二年呼兒爲寫照羨子未華顛笠繖傳清德緋魚媿昔賢春明萬花發應到象江邊
報道新州牧春陵舊使君山川壤相接慈惠日應聞桂海久無瘴松牌高入雲暇爲搜洞壑或有柳遺文

題鍾道歲朝圖

又貌鍾道當歲朝十年故事爲重描癸亥歲朝初兒曾仿奴頭真鍾道野溷豪豬爲圖以
五言詩 不知漿酒謠真驗欲向中山乞一瓢

題之
樹抱山根竹緣坡峯橫嶺側鬱嵯峨此中大有紆回處枉說終南捷徑多

前策癡驢後擁車同游省寄大雷書驚心老姊相離久那禁申

申不罨翁朱氏姊別十四年明年七十矣

郵店春醪釀滿尊湖亭梅柳近堪親得歸便是燧年福未必青

壹齋集卷二十四
六



壹齋集卷二十五

當塗 黃 鉞 左田

古今體詩六十二首 癸酉 甲戌

立春日戲作生菜梅花畫幅因題其上

廿枝筠管逾鱗角百番雲箋勝海苔攜得御鑪香滿袖親從天

上帶春回 是日進春帖子拜筆墨箋紙之賜

餅如盤大酒盈杯暎入盆梅爛漫開傳語兒孫須記取老夫曾

敲茶根來

獨酌

好雨晴兩日砌艸碧已滋東風泮池冰鱗鱗弄漣漪小鳥鳴前

楹勸我把酒卮一卮輒復醉脈脈有所思臨流顧華髮不如楊

柳枝

壹齋集卷二十五

一

柳枝亦以短無復當年長絲絲二月時裊裊舒微黃舉杯遙問

之今昔能相忘纖腰一搖曳猶自垂千行寄言鶯與燕任爾相

頡頏

池冰盡泮新水粼粼感賦

三尺池冰比石堅春寒又遣雪霜兼費他幾許東風力磨出青

銅鏡一奩

年年冰泮輒咨嗟惟見簪簪露敗遺若解琉璃淨如拭當時何

必種荷花

舍南舍北碧于油付與閒身照白頭欲挽春波爲商榷可能分

潤麥苗不

上巳園居

重雲當戶暗細雨逐風斜池柳一分綠山桃幾點花何人脩禊

事有客憶天涯芳艸湖隄路春風勝若邪

半壁店行帳口號

氈帳平臨綠野開幾株紅杏傍邨栽夕陽暮靄蒼泚合坐對房
山酌雪涼涼酒以春分日雪水合釀者為佳

三月十九日 召見秋瀾行殿奉 敕先往潭柘看山

作畫

潭柘先幽州昔聞古老說京居四十年曾未憩游轍蹕途蒙

召對

天言此幽絕汝往宜為圖位置

朕先揭梨桃繞邨居樓觀藏嵒岨攬茲形勝全授汝山水訣載

拜喜且慚臣筆實屏劣名山貌大難明詔奉乃迭今携巖寺花

昨踏臺山雪辛未城西巡奉山靈如有知應亦讓叨竊維時

壺齋集卷二十五

春已淡滿眼翠可擷安得攬荆關老筆色為設西笑望烟雲須

與已變滅

自佛耳門溝至潭柘寺紀游

未至佛耳門先見少師塢姚廣孝鈴語送松風驚飛滿天鴿入谷

石嵌空鑿壁棲老衲苔葉蝕袈裟不知幾僧臘閒亦有題名石

泐不可揭仡仡崇傭高曲曲線路踏石火進馬蹶螢光乍開闔

因悟此澗瀟山陵水合沓春晴跡稍通夏雨石旋礪是宜稱為

溝百谷所容納忽然森開張記里已逾井石屋兩三家花光四

山合能白復能紅不使凡卉禱居然武陵源但欠谿吹蛤

潭柘山之名寺為晉嘉福山寺兩相蒙名稱姑徇俗見山不見

寺為腹不為目直到寺門前始知在山麓入門泉涓涓繞階碧

如玉辛夷方作花牡丹苞已綠修纖竹捎雲偃蹇松蓋屋今春

苦久晴塵土沒車軸到此頓清涼頭面若新沐山僧導我游層臺禮尊宿因觀妙嚴軻方正函以木昔傳印五體今但穿兩足五鳳造非初雙鳧化難復更徵像有無山僧答且惡長老已不知不惟我也獨一笑姑置之樞衣入淡谷

欲窺龍移湫由寺向東出未及上翠微有庵在林密人言姚少

師當年此示疾大師卻無墓少師乃有室升階香火微中坐禿

厮一伏犀易病虎頗笑塑者失况貌僅中年不類八十四集韻讀如

悉北郭詩自佳西山老堪佚奈何性嗜殺欲以彼法律更上見

龍湫一匱清欲溢出寺卽伏流渴不救篷簞龍何私于僧此理

向誰詰下視佛耳門塢影小于筆了了見來時細路裊魚乙

題孫忠靖公遺像

公忠公節婦孺知異代談者如見之悔庵樂府梅邨詩曾何待

臺齋集卷二十五

三

我覩縷爲前年視學雲代時見公臬仍於公祠祠牆雨壞屋已

敬出錢二萬俾墜茨爾時州牧老且疲三載不葺將不支公同

姓新良有司孫君下車一見興嗟咨是守土責丹雘施唐陳尸

牖靡弗治大府舉最重載馳載公畫像來京師邀我贊頌夔龍

姿我非其人媿且辭世上自有瓊瑤辭憶昨試院行有期公孫

捧像當階墀謂代答謝禮所宜急令將校兩手持開門迎候送

如儀空幕趨訝客爲誰再拜公像仍豐頤應笑小子何衰羸煩

君傳語公孫枝力學毋墮家聲垂勿恃祖澤夔可推縱百青衿

詎足裨公靈咫尺吾不欺食茲舊德當敬思不見當年兄弟一

髮千鈞危馬革欲裹悲無厭

癸酉七月八日再奉典試山東之命次甲子紀恩

詩韻

未搜寶鼎出汾陰又遣榆材到配林

帝舉章賢欽作式

初九日

召見勳政殿

論云山東人材最盛往時劉統勳父子及今在九列者皆有譽

望臣

非陸贄媿滋深難期珊瑚網千尋樹惟竭葵忱一寸心老去

論文知入細重來要不負青衿

河閒二十里舖邸店壁上有柳枝詞四首後跋云昔年

典試粵東行德景道中作柳枝詞數首今再過之零落

盡矣感嘆之餘復作四闕書于瀛洲者詩成于此夕也

甲辰九月西川李兩邨周言二八題曰周言二八者離其名

之文耳

淡夜琵琶特為聽

即李句

香山遷謫感娉婷如何驛路占臨分卻

向章臺滯使星

重來猶復憶行雲一曲楊枝夜已分所幸當時無醉尉不曾呵

壹齋集卷二十五

四

止李將軍

兩邨向有小季將軍之目

雨發齊河

八月朔日

樹頭雲脚尙冥濛截道橫流斷不通泥滑未收騎月雨輿行如

遇打頭風所欣秋稼含苞足真有春膏潤物功安得晚涼閒載

酒明湖一櫂鬧紅中

再至濟南

黃岡十里路盤紆樹影湖光半有無我比遺山來恰好真看烟

雨鵲山圖

近城風卷宿雲開放出重巒翠幾堆知有山靈暗相報十年喜

見故人來

雨點征衣溼未乾馬前父老笑爭看分明指說髭須白不似當

年舊試官

慚媿諸生道上逢曩時頭腦太冬烘縱教博得中郎識曾是吳人爨下桐

雲寢郝兆錕

以庶常出知泗水縣余丁卯湖北鄉薦士

也登第七年未獲相見癸酉秋襄校山東試事始晤于濟南鎖院喜賦二律贈之

鶚薦未相見逢君濟水秋絳都前太史泗上古諸侯校理資青眼冬烘笑白頭門生看親放差喜勝黃州

蟾窟爭攀桂何人第一枝傳衣增我媿造榜若天私榻首出燕君門下燕雀衡容易冰壺清可知願君書治行課最亦如斯

贈周黃縣傳

曩作諸侯客真如同隊魚舟年雲再逐白髮雪盈梳舊雨湖山寢春明日下居師門重回首相對一歛歔周為朱文正公江南丙午所取士又皆客

其幕下

壹齋集卷二十五

五

九月初三日闈中接奉 廷寄蒙 恩補放山東學政 恭紀

舊節頻煩握

新恩雨露偏姓名凡再易

先是以兵侍吳芳培為山東學政旋改任

直隸以吏侍戴聯奎簡任山東戴又以憂去遂補放臣鉞文字有因緣地擅湖山勝門多鄒

魯賢高樓容嘯咏且喜住三年學署有四照樓為施恩山先生題

奉 命主試山東鄉試武闈恭紀 帝命暫司戎爭開兩石弓何人覆犀兜一舉滅沙蟲時撫臣同命臣鉞主試安枕民方待籌機策要通書生味翰畧無以慰

宸衷時滑縣尚未復

王秀才桂雲以曾大父秋史先生禪喜圖屬題

晚而得第如東野熟不因人似伯鸞望水秋吟黃葉好成山詩

補白華難百年風貌留禪喜一瓣心香接古歡幸有文孫愈二
老不同葛帳練裙單謂新城德州後皆不振

濟南試院五詠

樓上湖山入望曾十年闌檻又重凭使君過去知多少為想風
流屬宛陵四照樓

非閣非船寄水涯寒波淼淼漾窗紗紅梅破萼黃梅放酒暎杯
香獨看花蓮子湖頭不繫舟

樓下清渠水一條板橋東畔濯纓橋不須清濁從人辨一色分
明金鱗苗濯纓橋

滿園榆柳葉紛紛只有名花致不羣好待春明春睡足真成水
上覓紅雲海棠沂

磴古苔封強欲階樓存寺圯尚名街道人休詫鐘聲寂為愛湖
光非趁齋鐘樓樓南為鐘樓寺街樓屬署內故鐘懸而不撞

壹齋集卷二十五

閣立本鎖諫圖綱本無款印明王穉登跋引張彥遠唐朝名畫記有閣令鎖諫圖訂為真蹟梁

清標韓逢禧朱之赤皆有收藏印記

六劉之寵傾後宮麗華美豔寡合同阿嬌尚欲金屋貯鸚儀豈
惜崇樓工何于鼠子陳元達生來哭人不求活鎖身庭樹與樹
枯植立如山不能拔十生九死爭須與叩頭流血煩司徒萬言
會不敵一笑況有請灰堂中書如聰驕暴甯知媿轉圍聊博蛾
眉媚不見徽光殿未成東市誰揮斬陵淚冤哉陳公終致命枉
效朱雲以灰諍惟將載記付崔鴻刺有丹青貌閣令此卷位置
將毋同聰也獨著雙鞵紅頰頰睽睽一凶豎不知經史何時通
爾日君臣面如墨想見怒雷聲未息武夫手刃卻不前似已暗
通劉后敕劉娥翩翩來何遲兩手捧疏前一姬姊英已灰小劉

賜其二執笏知爲誰畫師不是閒驅使禍水唐家貞觀始樹下
雖無鎖諫人宮中卻有五娘子三代法鑒存於書故事何必徵
句奴願前摹寫姪兇筆爲畫周姜脫珥圖

登岱

陽魯陰齊壓海鼇秦封漢禪笑紛紛舊儀偃蹇存應劭故堞蒼
茫失奉高環道千人旋磨蟻松風八月廣陵濤我來分寸躋攀
上仰首天關極目勞

御帳坪開碧玉屏萬松相對兩山青摩崖字裏尋名蹟流水聲

中讀石經唐宋人題名輒爲明人摩崖大字所掩石經略八分字大如斗流泉被其上今亦剝蝕過半雲錦

隊惟憑想像棗黎錢亦漸凋零道人休便成嗟慨灑潤飛甘此
最靈

金闕峯巽逼太清蓬元天上御風行峯攢劒笏朝青帝雲湧於

壹齋集卷二十五

七

旂護碧城圖有真形誰創見碑無文字世難名明皇更比秦皇
侈銘石填金飾太平

兼衣丙夜怯高寒東望滄溟重撫欄天宇冲融張赤帟霞光晃
漾走金丸雲中雞犬聲猶寂枕上邯鄲寢未殘一笑廿年空早
作滿身塵土日趨官

過莒州宿故蕪湖縣令張君肇揚家留二絕句

道經莒子城邊過假館于湖舊尹家猶有燈檠牆角立河陽曾

照昔年花聽事有鐵燈檠二蕪湖湯天池所製也

芝蘭玉樹滿階墀園中玉蘭正開其幼子出見年已五十餘歲諸孫中猶有在官者廉吏誰云

不可爲我比田夫能說尹何人解作少陵詩

將軍嶺在莒州東六十餘里山路險僻行旅常有戒心

嶺上閒雲不可耕谷中刁斗夜無聲如何卻有將軍號隻埃憑

誰管送迎

未至諸城二十里雷電雨雹交作

硬雨大如梅李核濃雲色比老鴉烏何人貌取好東絹便是升
龍北苑圖

寒亭

白狼河上柳冥冥橋下河流靜可聽紅日未升烟未泮曉風吹
寢到寒亭

萊州道中

西環大海氣滄涼東望羣山劇劍鋌三月鶯花萊子國六經潭
奧鄭公鄉居民自擅魚鹽利漕使誰通黑白洋好鑿膠河便飛

輓暫紆

天顧眷淮揚

壺齋集卷二十五

八

雨中過諸由觀爲淳于髡太史慈故里

在黃縣東二十里山中

淳于齊贅婿子義漢英雄兩立雙碑在風流竝宅空林虛鳴鳥
寂島近片帆通鎮日荒山道行行犖确中

登州望海嶺

織羅不動海天寬咫尺蓬壺得縱觀雲水光連黏地合蛟龍氣
近逼人寒造橋神枉鞭山石求藥身先誤馬肝卻笑羣仙戀方
丈不知人世上天難

登州不見海市詩以解嘲

登州海市奇復奇塌來按試希見之扁門十日捩眼窺但有萬
里長風吹聲猛氣勁驅者誰撼我牆屋虞傾欹我聞方丈東海
陲龍宮萬頃堆琉璃瓊華光碧陵丹曦濡染元氣何淋漓羣仙
往來相游嬉升天不願甯非癡幻者安處真者危飛賤欲訟觀

之師又聞神山隔渺瀰金銀樓觀光參差望之如雲卽已移當時方士見不疑似卽海市所閃爍如瓜棗忽誣安其蒯通傳遂更侈以荒唐詞童男女究何辜罹風引舟去無還期種種妄誕不可思見與不見從人欺或云城郭揚旌旗或云羶車駝馬馳或古寺有浮屠搢或人戴笠行委蛇或惜變幻不一時或幸終日呈多姿疏林茅屋映竹籬憑依五島曾不離市見必于沙門牽牛鼉磯大竹島之上神仙狡僮彈指爲至巧誰令蛟蜃私我來未禱廣德祠不使快覩理亦宜海若一笑還支頤兒童之見何其卑樓臺倒影君家池分明一幘丹青披微風滅沒隨漣漪不聞致怨封家姨書生積習誠難醫正坐誤讀東坡詩

蓬萊閣謁東坡先生祠

曉日瞳矇島嶼開先生端合住蓬萊能陳利病還朝後不負邊

壹齋集卷二十五

九

州五日來公登州召還有議水軍及請罷推登萊鹽狀鴻爪無心留勝蹟文章有用乃奇才到今意氣傾山海誰說龍鐘造物哀

嘉慶甲戌三月廿七日校試登州諸生詩賦以東坡留

別登州舉人詩令其追和閱五日而有 召還南齋之

命若應讖者亦賦二律留別

老去難期汗漫游者番行盡海東頭玉堂三人誠何幸珊網全

收也合休余再主山東鄉試東郡獲雋者甚衆今視學亦先試登萊而去知名之士一時始無遺佚留別詩

教賡玉局 召還讖果在登州諸生珍重臨歧路可有箴言贈

我不

觀海新從登岱來雲峯雪浪共崔嵬慚無許劭人倫鑒定有夷

吾天下才道第那能禁翦薙軍譁休便怨衙放蓬萊好讓羣仙

住歸綴清班首重回

行抵萊州蒙一恩除授戶部右侍郎恭紀

臨江小縣久荒寒二百年來無此官父老傳聞應說項諸生相見為彈冠遷逾分外人方訝去冬以侍講學士蒙恩除授內閣學士已為不次之擢未八月又切惶悚授今職實貧到

天知世更難多少郎潛同白首感深不覺涕洟瀾十年前同為人四五

青州道中書所見

乍暄乍冷麥黃時千里雄風日夕吹到得青州邨落好棗花香裏看纈絲

新城張店交臂至長山戲作

黃塵三尺撲征鞍馬首兒童拍手歡畢竟人情還念舊桃符雖退尚爭看

五日涿州行館

道路誰開解纓筵把杯那不憶江天歐湖一隻涼篷子回首烟波十六年

四照樓會幾日開好花都為後人栽明湖也有滄浪興卻擁黃塵艸艸來

澄懷園夜起

水花風葉作清秋夜起林園冷欲裘乍軸池簾看落月忽聞街鼓送鳴騶勞勞身世成孤注鼎鼎年華迫旅酬擬效東坡署齋榜北窗睡足更何求

東抵黃睡西雁門征衫塵泥尚留痕青天碧海牽牛島白日黃

沙秀女邨在大同府南數十里過眼烟雲留畫本論心朋輩失琴尊小山

叢桂香猶癡孤負庵門秋樹根謂江鄉舟木庵老桂也

九日香山直廬作

岱頂瀛壖彼一時登高作賦最相思
鴻泥條爾成陳跡烏鵲依然繞
舊枝照日樓臺炫金碧漫山木葉
翦琉璃可憐屐齒蒼苔澀欲采霜
花卻遺誰

題子卿二牖泛舟圖用竹垞先生題田山薑秋汎圖韻
竝效其體

憶昔乾隆三十有九年時惟上巳
禊飲古所傳舍人徐昆邀我泛二
牖逝者今半存者皆皤然子卿侍
御奉命此監察奉子卿

命抽查

五日一泛慶豐牖口船千夫負米
如蟻頭戴粒卻推蹶

頓襟省何囂闐秋風忽吹佳客五
人到臨流一笑河水清且漣石橋
挺挺青帘柳陰出瓜瓠纍纍翠
蔓茅檐牽眼前頽垣敗瓦壞馬鬣
當年朱門貴胄矜牛眠何如及時
行樂且作達賦詩作

壹齋集卷二十五

十一

畫下筆狂欲顛惟憐我身吐絲類
蠶縛不得共子上下相溯沿水光
山色今日想猶昔而我顏蒼髮白
非從前安得高浪遠駕蓬萊閒
娥英琴馮左右分吟賤黃金白銀
宮闕在眼底與子拍手合唱飛龍
篇

園居秋晚驟寒

葉葉聲乾走曲廊巖巖苦霧黯書
堂不須喚老求燕玉惟惜瘵愁少
索郎池水波激魚避餌籬花霜晚
蝶憐香猛思三徑曾何有翻笑淵
明枉自荒

送秋山先生之任保甯

談笑山城靖撥丸一麾十載始除
官先生以孝義聽同知推升保甯太守長安米
賤居原易蜀道時平去不難五馬
踏青春市靜三峨戴雪碧天寬後
生定有王褒在樂職詩成好乞觀

當塗 黃 鉞 左田

古今體詩八十一首乙亥至五

新夏園居休直

休直官園睡足時日高槐柳綠周池將雛燕子穿簾疾出水荷花上葉遲萬里山川忙裏過百年日月暗中移也知樗散傻鳩拙卻媿頭銜是度支

送秦光辰之任滄州

誰解因時濟猛寬最難為是牧民官清醇要與芳醪似盜賊還須赤子看無棣新河費疏鑿中條舊隱孰桓盤清風樓在宜佳日暇奉高堂一笑歡

猛雨

壹齋集卷二十六

猛雨生夏寒孤衾怯清簟燈殘窗未明雲溼星猶斂遙聞雞載號乍見螢一點何處殷雌蠹車行聲冉冉

題龔開洪崖先生出游圖並引

張衡西京賦洪崖立而指麾李善注三皇時伎人郭璞游仙詩右拍洪崖肩注神仙傳曰衛叔卿與數人博其子度曰向與博者為誰叔卿曰是洪崖先生唐歐陽詹有徵君洪崖子圖賦云矯矯徵君居幽行聞朗詠堯年之日棲遲姑射之雲朱存理鐵網珊瑚載閻立本畫洪崖仙圖東坡跋云先生不知何許人也姓張名蘊字藏真開元中已千歲明皇仰其神異累詔不赴多游終南太華或往青城王屋與東羅二大師為侶先生戴烏帽衣紅蕉葛衫僕五人名狀各怪曰橘朮栗葛拙有白驢

曰雪精日行千里復有隨身之用白藤笠六角扇木如意筇竹杖長盈壺常滿杯自然流酌每跨驢頌僕游於市廛酒酣笑傲自若明皇詔圖其像朝夕瞻觀之黃大癡跋云往見錢舜舉龔翠巖畫洪崖仙圖其人物與此卷似而筆路染色各自不同今觀此圖製作皆有唐人法度非錢龔二老可及誠舊物也今內府所藏龔開洪崖先生出游圖景物悉與坡跋合當卽大癡所見龔開之本卷尾有無名氏傳云先生爲張氹晉陽人道號洪崖子開元中明皇召見於湛露殿上曰朕何如堯帝先生何似許由曰陛下道超堯帝臣則德謝許由昔堯帝召許由而不至今陛下召臣而臣來上嘉之拜太常卿累遷至司徒皆不受辭還隱姑射山不復出與坡跋

壹齋集卷二十六

二

異神仙有無是一是二姑勿深考若東坡大癡所跋之本朱性父以爲閻畫其誤則較然也無名氏傳拙作咄栗作藤龔自題詩中拙又作茁按拙咄茁形聲相近藤則當從坡跋作栗蓋五僕一驢名皆一聲不應歧出也

洪崖先生知有無姓名出處言人殊朱君著錄閻令畫跋語並載眉山蘇坡云明皇徵不赴詔寫其像從山居流傳當自開寶始未應貞觀先爲圖後來癡翁亦有跋製作謂具唐規模又云舊物不可及龔錢二老差不如可知不是博陵筆鐵網枉自收珊瑚此卷當卽癡所見傅色濃古衣紋麤長歌紙尾疏畫意八分自署龔開書先生頎然七尺軀秀逸迥異山澤矚紅蕉葛衫紗帽烏巾竹在手曳不扶精采奕奕風飄須神爲馬兮尻爲車往來終華纔須與奈何猶與人爲徒葛拙栗朮雪雪驢鐺笠如

意杯杓壺雪日千里忽不趨負而鞭者爲前驅最後爲橋爲侏
儒手持大扇行趨趨誠如闕船張籛籛形容盡致堪軒渠見龔詩自

題藐姑射山先生廬昔住其下三月餘或曾領僕游市衢憐我

目眯塵模糊我於先生無所需願借河上艸本五千注一校人

閒俗書之魯魚無名氏傳秦休莊贈先生河上公注五千言艸本如聞先生縮鼻笑我

迂至人隱見雲卷舒何況語言文字尤區區不聞老子猶龍乎

吁嗟不聞老子猶龍乎

蕭翼賺蘭亭圖

佛經物色輒自誇琉璃七寶名安如山僧弄物最能久佛骨佛
牙留不朽何堪片紙靳流傳深藏寢室愚可憐不圖對面爲盜
賊頓令至寶隨風烟圖中僧俗凡五輩辨才禪榻與客對待者
枯腊類愁胡墨色不隨衣色壞座隅執事有二人一髯噓沸爐

壹齋集卷二十六

三

火親一童僂僂薦茗器似候湯熟聊逡巡老僧以塵指其掌張

口如聞發聲響書生袖手謬恭敬機心暗與肩頭映此圖跋者

吳說與樓大防吳云已得樓初求夏將樓跋與此較彼童書帙

非茶甌攻媿集云野童自隨亦攜書帙此正畫其納交之時今此圖童子僂僂方捧茶盃未進與樓本異信乎世多摹

也自是人閒有數本難得鉤摹氣淡穩筆蹤簡古狀如生絹素

雖殘神未損當年君臣果有之巧偷真箇同兒嬉度支豈乏千

金值何物老僧求不得早知繭紙歸溫韜不如暗檻猶堅牢紛

紛肥瘦都無用省卻書家如聚訟

乙亥長夏奉 命檢校 內府所藏書畫得觀米芾自

書吳江舟中詩卷天矯奇變絕無劍拔弩張之態與人

閒鑒藏者迥異賞歎之餘謹賦此詩

附錄米芾朱邦彥自秀寄紙吳江舟中作詩昨風起西
北万艘皆乘便今風轉而東成舟十五緯力乏更雇夫

百金尚嫌賤船工怒門語夫坐視而怨添掉亦復車黃
膠生口嚙河泥若祐夫粘底更不轉添金工不怒意滿
怨亦散一曳如風泥叫噉如臨戰旁觀鸞寶湖渺渺無
涯岸一滴不可汲況彼西江遠萬事須乘時汝來一何
晚按敵當作闕寶今作
脰紹熙雲間志作寶

雲物龍蛇森動紙光怪逼人驚欲起不解公書筆筆超但覺我
書筆筆疾或如寫竹葉乍抽或如古木藤交膠長風送帆千里
疾駿馬縱轡懸崖收人閒藏弄知多少敗蔕紛紛盡可掃道子
天人自有真葉公真龍乃嚇倒此書此詩兩崛奇我欲逢人說
項斯心知其妙道不出天上玉堂誰見之

宋徽宗畫聽琴圖

圖畫一元裳道士中坐鼓琴左右二人俯仰作諦聽狀
高松一株凌霄叢絡其上花一一可數當松之上蔡京
大書一絕句殊無人臣禮左方有徽宗瘦金書聽琴圖

壹齋集卷二十六

四

三字右方復有御押向藏真定梁清標家康熙丙寅重
背仍用宣和時直幅橫裝式押縫政和小璽固在也今
歸內府

帝子神霄鼓玉琴左元仙伯獨知音可憐不解田文泣猶作秋
蟬自在吟

一曲清風萬壑哀松庭隨意坐莓苔陵茗特也無知甚故向蒼
官頂上開

可是東都舊主賓俯聆側聽各凝神試看緇服黃冠者多恐君
王自寫真

米友仁五州烟雨圖卷

卽江邨消夏錄所載者

三日困溽暑一雨蘇衰慵捲簾看西山失卻牆頭峯因思五州
邨動盪來心胸矮紙僅三寸千萬雲山重雲橫如水波山好如

芙蓉天風一吹蕩闖露何丰茸我本浪游人黃海曾支筇朝看
天都見莫對蓮花封恨未將虎兒收攝歸筆蹤至今一追憶滿
眼青山濃

憶季高

花發同君來花開送君去君行遽幾時花落已無數高榆橋上
陰垂柳樓前路幾度獨徘徊惆悵斜陽莫

子卿出守江蘇至熱河請對畱詩爲別人而未報聞
其已補徐州作此寄之

贈詩老嬾未能酬厯鹿征塵萬換裘命酒餞君臨紫塞讀碑記

我上黃樓

黃樓有蘇子由黃樓賦碑余曾至其下

風雲氣壯憑懷古鴻雁聲多易

感秋兩度扁舟曾喚渡幾時乘月更來游

河流城上走奔雷捍禦頻驚羽檄催也解兩姑難並事當思教

壹齋集卷二十六

五

婦在初來行春車要褰帷過延客堂須待葢開家有青箱留奏

牘休忘選擢自南臺

君曾奏請纂輯治河方畧得允

山多堉塿費犁鋤州傍河孺少積儲此日俗惟爭佩牘當年計

止免爲魚思謀恆產先除暴欲識王章教讀書我本老生老

無用常談供爾一軒渠

平生師友更昏姻秋辦冬整共苦辛小別五年如范陸

石湖與放翁別

軋五年見石湖詩集余與子卿四一邨何日聚朱陳得歸毋待

十年中先後相別亦不過五載山資足有暇還令卷軸親莫羨繁雄求劇郡須知官職爲他人

扈從避暑山莊至上蘭紀事詩

昨宵猛雨走庠奚雲外長城極望迷何意四夏寢中過關門已

遠始聞雞

捫參歷井到天門萬馬驕嘶不敢奔我昨肩輿過平定羣山視

此直兒孫

平定州亦有南天門

後挽前推不可行山高泥滑石縱橫駱駝連鼻車銜尾竟夜泉聲和雨聲

青石梁遇雨

樓臺金碧李思訓市肆繁雄張擇端不用遠搜唐宋蹟天然畫本在興桓

僦直人教一吏偕金題玉躐互編排歸來捫腹真叨竊日飫

官廚

松鶴齋

奉命於行殿之東松鶴齋檢校書畫並日給飯食瓜果

行殿西偏直舍開松陰亭午獨裴回銀盤鹿肉蒙分

賜道是

君王親射來

香艸丰茸三尺羸據鞍似踏綠波行怪他馬耳雙尖浸盡作春

江風雨聲

馬入峭地一聞州香則羣嘶爭蹴

壹齋集卷二十六

六

但聽河聲不見河羊腸一綫艸中過經行濶處臨流翫訝是廬

溝卻白波

伊遜河俗名羊腸河窄處多為豐艸所被水色若黑勺之仍清流也

一林霜染一林紅閒厠千巖萬壑中定是黃姑助青女織成幅

幅錦屏風

彎弓盤馬上嶢岼徹夜周陆不卸鞍失笑冬烘無倚著圍鑪

帳尙憎寒

長松青翠列平原似有人家雞犬喧知被仙靈相占斷此閒元

是古桃源

花朝對雪

九九昨盡今朝堅冰在硯寒未消山茨水檻癯不到命酒對

雪歌無膠人言畫似兔毛褐自笑書亦鸚哥嬌蹉跎老矣百無

用尊前白髮風飄飄

穀雨日游清泛園次程助教厚韻

流光如馬奔難御不管堂堂春欲去餘寒三月尚兼衣穀雨今
晨始暄煦屢思腰腳散痺頑叵耐心情輒乖互良辰驀記舊游
蹟嘉客招呼領華據欲憑十畝好園池一洗經年夙塵霧乍親
水竹意蕭閒似觸機鋒頓開悟蓬門閒任綠苔生柳橋劣可
躡步履步敗舫依然前度橫花源不見漁郎湖看竹林無徑造人窺
魚汀有飛來鷺念昔荒寒剩一亭載酒初偕朋輩赴縱橫野水
長菰蘆欵乃空思聽韶護辛丑游此池水頗寬而無舟是時花木頗紛敷
雨陂池未填淤暫過旋驚舊境新重來不識從前路豈惟主者
易再三劇憐吾亦成今故為舉園名世不知幸有丹青圖未汗
辛丑見壁上詩石題為清泛園今無人能舉其名矣嘉慶
癸亥俞小山招游余曾繪圖自是子卿葉山皆有作四十年
來一剎那可歎人生若朝露對酒當歌君莫辭醉歸何礙車茵

壹齋集卷二十六

七

吐卻笑人偏山水廉非關我獨烟霞痼惟慚忙苦少閒樂如值
調飢不能餽好語當階紅藥知開時有酒還應酌

齋中禱花盛開漫賦三絕句

又費東坡幾畫叉買栽躑躅載專車那知三月新安路開偏春
山不算花

江南二月杏花時北地春寒開較遲卻被山桃賺消息牆頭先
放兩三枝

珍重黃鸝幾箭蘭如徵高隱到長安寄言安石今須出不作尋
常小艸看江鄉呼春蘭為艸蘭索值甚賤京師不易得也

送吳信中修撰典試廣東

龍頭早歲飲香名詔簡西清藻鑑精雲笈未登羣玉府星軺
先指五羊城時編次祕殿珠林石渠寶笈掇珠澄水應無類攀

桂淮山卻有情盼爾遄歸同瀑直酒邊聽話海波平

六月十二日以料理錢局不善蒙 恩調任禮部右侍郎

恭紀

度支謬領媿非才

聖主優容實幸哉園法未能諳九府禮儀仍許習容臺書銜雅與冰廳稱畫諾曾無熱客來便喜遠人航海至賓筵何意獲躬

陪

時英吉利國入貢將至

園居曉晴

猛雨三更晴池光散初旭荷花開已稀荷葉洗更綠清芬時襲衣秋氣涼滿屋何處鶴一聲居然在空谷

對雨述懷

眠時天宇晴睡覺雨聲大蚊稠苦鬱蒸輾轉久難臥攬衣起開門默默看雨坐西疇多高粱東臯富黃穉胡爲耗太倉一粒不

壹齋集卷二十六

八

能播負茲時雨恩難免百日餓

我家本當塗僑居於蕪湖四傳及我身貧到錐也無廿年官爲家故里宗親疏不因有墳墓幾成無籍徒

君恩濫叨竊謬作卿大夫司農復宗伯職在教養俱一身尙如此况復他人歟

我有五男子三子青青衿屢入澤宮射不聞中鵠音謂是荒于嬉章句時披尋人生貴無忝何用皆華簪會當荷鉏犁相率歸

山林樵母憚山高漁勿嫌溪深

我生亦云勞我老似當佚七十古來稀今已六十七作畫不滿厨賦詩僅盈帙暇取陶我情求知固不必赭山陶塘閒水木頗明瑟築堂歸去來及此未衰疾

題畫爲程勤齋助教作

經年不作畫面上俗塵滿積雨生秋寒興到偶拈管滿眼皆古人落筆來頗早都緣清俗殊兼之臨摹嬾幸有門前山腕底青未斷但慚亭中人看山獨蕭散

君家近黃山日對峯六六渴飲翠羽茶飢食黃精粥雖非仙者居自足山林福我亦曾往游天都翫飛瀑此身忙苦櫻此境寢寐熟願君攜此圖爲我買山屋

秋夜

纖月出喬柯秋風老芟荷林光感烏鵲露氣耿星河未免長年歎難忘對酒歌此身信飄泊歸計久蹉跎

白髮慚先達青雲屬後生居然忝簪紱何者是功名山果經秋實巖花著雨榮表回風露下孤負短燈檠

壹齋集卷二十六

九

劉肇均主事招游那園

劉君招我城南游云有池館臨芳洲紅塵眯眼甘季久正欲一洗青瑤流纖雲四卷天宇淨單衣乍試涼颼秋入門有橋跨溪水循廊陟磴躋崇邱虛堂密室極精緻蕙樓蘭橈窮彫鏤瑰

翫地石萬里玻璃倚壁屏森修

中堂三楹翫大理石爲地旁列玻璃屏高幾及丈

窗綃

斷裂難悶豔壁畫剝落涎蝸牛摩挲几榻憶佳日定陳竿瑟揚清謳何時風流頽消歇使我目擊增煩憂有如天吳綴短褐又

若鞞補千金裘蛛絲蟲網顧不樂舍之竟上沙棠舟乃知茲園在中泚千章葆樹環而周我聞韋靄園近宏善寺荻花蘆葉溪

堂幽四圍多水蔭佳木斯園豈卽韋園不是時貂璫競佞佛兼營別業差爲優三百年來易幾姓詩篇空復傳王區

韋公寺在左安門外

二里明武宗朝內侍韋靄建賜額宏善寺寺東行一折有堂堂三折有亭亭後假山亭前澗溪溪里許蘆荻滿其中又韋中貴

別業四圍多水荻蘆蘆花寒雁秋風令人作江鄉之想王世貞有章氏水亭詩區大相有游城南章氏園詩並見日下舊聞今園正在宏善寺

東或卽其遺址 國初王宋亦有句看花似祇登僧樓園時或已屬安邸西陂載酒會夷猶

王漁洋宏善寺看海棠詩不知冷節匆匆過猶見僧樓一樹花宋牧仲過章公寺詩竟阻尋幽興空齋作賦才開尊思兔苑杖策過香臺自注是日游安親王園不得進而返似當時章園已屬安邸

矣不知今者又誰氏笑我看竹同王猷

今土人或呼爲隆家園或呼爲那家園酒酣扣舷發浩歎雁鴻爪影誰能留汀楊浦蒲風響亦但聞蟋蟀

吟啾啾

范梈生太常舊宅在櫻桃斜街余館其家前後幾十年

聽事老榆猶余昔時手植今已出屋尋丈矣三冬入直

日夕過其門感而有作

曾記琴書舊所依屋廬猶是主人非不須更訝須眉白手種榆

今已十圍

壹齋集卷二十六

十

旅食京華劇苦辛輒因車過感前塵而今踏鼓趨公者卻是寒

聽擁絮人

多君豪似張平甫憐我寒如白石儂聞道孫枝材中管爲慚無

力致方邱

攝生孫某大興諸生今年余主順天鄉試失之甚可媿也

題元顏輝陶學士掃雪烹茶圖

笑妮蛾眉絮歲寒梅花爛漫雪花殘不知掃雪烹茶者可以郵

亭秦弱蘭

壺盧依樣畫年年禪艸當時太急煎不必党姬言可媿應憐頭

骨未貂蟬

季高歸孟縣余時倅直西園作此送之

今日天氣佳適我西園館開我池上軒池冰猶未泮虛寒室不

溫頗費地爐炭鋪牀思偃息明月照簾幔忍寒翫清光獨就林

閒看

獨看情不歡言念將歸人十年從我游跋涉忘冬春豈不樂晨夕高堂有老親男兒貴曠達底用憂賤貧況復當盛年爲德方日新思貽令名歸勿厭京華塵行行重來游知己終當伸知己伸何難良金必就冶古來賢豪人大半出幕下寅入申始歸晨書暝復寫燼杯與冷炙感嘆知音寡但聞三上書不見萬閒厦青雲雖有路此道眾所假

我昔少賤日旅食歲奔走日寫書萬言夜閱文千首簡翰復襍投十嘗答八九暇輒爲詩歌投瓊而報玖是時主人誰吾師盤陀宴愛我如子弟期我意良厚終焉出其門謬廁大夫後子才如圭璋特達偶不偶當思萬人敵勿作畫地守持歸詢高堂此論然乎否

初春懷子卿

時因事在邳州

壹齋集卷二十六

七

艸色含青冰泮池門前楊柳弄柔絲一年最好初春候百感都歸獨坐時江寺看梅人影亂寒廳酌月漏聲遲可憐老守情懷惡手板趨風不暇思

憶湖上再寄子卿徐州並柬葉山淮上

陶塘塘水碧于澱鐵佛梅花落如霰綠楊邨店酒人多翠黛芳隄游女徧冷吟閒醉幾經春一別廿年都不見彭城老守昨同舍葉山樵者今異縣當時膠漆剩二君此日參商艱一面黃流撼郭怕登樓白髮依人猶抱硯依然車笠盟未寒但恨雲龍身不變聞說江梅頂已髡旗亭亦改閒庭院

鐵佛寺梅頂已枯湖上移封館酒肆吳別

駕北標修葺爲別業宋莫伽藍記者誰彫零者舊難爲傳園居又落上元燈鄉人空約春宵讌詩緣感舊句多陳貧到無家歸亦倦臨風

南望寄相思天際飛鴻真可羨

嘉慶丙子十二月十九日徐州太守王子卿以東坡生
年生日供幕客及其子登黃樓拜公像賦詩見示作此
寄之

公生景祐歲丙子至今懷懷猶未久
公年四十守彭城至今壽
欲齊商彭繼公作守凡幾輩誰使徐民頌遺愛
宗莫黃樓八百
年惟有青山靜相對王君舊是玉堂仙
到郡偶值公生年登樓
拜像薦脯酒繪圖召客賡詩篇我誦其詩憶公作公守彭城樂
復樂豪從雷勝獵城南閒就山人攜妓樂知名坐客舟餘人更
來愛弟兼嘉賓中庭步月南臺夜洞簫臨水桓山春君今冷落
誰爲友但聽哀鴻驚出走時徐州有水災惡客幾人時復過清興三年
亦云偶須知公初亦良苦河決澶淵侵濟楚水流城下作雷鳴

壹齋集卷二十六

十一

人立城頭浴飛雨公才雄偉古所難築隄捍水須與安豈僅兒
童免魚鼈直將歌舞慰酸寒願君且勿憂河流願君且復勤登
樓若者當復誰當修今之視昔然乎不壽公三爵公其畱

澄懷園直廬海棠

前歲繁花真一癡

乙亥花最盛值屆從朝
未見海棠真一癡東坡句

去年綠葉但成

陰

兩子

何期好雨連番足爲染紅雲一色淡伴我頽然時獨醉

憐渠豔絕許誰簪莫辭燒燭殷勤照恐負芳春卻費尋

漫興

平橋水暖魚苗聚
壁柳風柔燕子高
鷺見海棠紅滿樹
誤他翠

羽啄櫻桃

藥枝破萼丁香放
幾度尋春欲命車
昨日山僧附書至
牡丹穀

兩尙無花

理徑教留諸葛菜編籬爲引鷺絲藤老夫笑有和生癖手掬榆錢帶糝蒸

濟南試院海棠泚雪綻霞鋪四照樓孤負名花到今悔開時卻在海東頭甲戌二月按試登萊

曉至盤山

月落烏嘯過薊州曉寒猶戀舊羊裘雨師似爲山靈壙膏沐烟鬢翠欲流

谿杏山桃碧葉新落英時復見繽紛馬蹏鹵莽真堪惜踏破田盤滿地雲

盤陀石似團茶纍偃蓋松如翠幄低雨過松毛香不斷雲歸山路徑全迷

三月廿五日蒙恩調任戶部左侍郎恭紀

靈齋集卷二十六

七

支計書生本不諳況兼泉府力何堪躡躑蹌深訝臣資薄曲宥偏蒙

聖度含合浦還珠人競羨入園委韭自懷慙頗知舉筆民生繫元凱前頭敢妄談

題暉壽平荷花卷

傳神太似包山子疏野遺形陳白陽要識南田真妙處腕中直是有徐黃

蓮蓬已老葉聲乾一朵凌風尙未燧恰似澄懷秋雨後近光樓下月中看

七月廿四日曉抵熱河仍寓承暉山館

門巷重尋曲徑斜借巢梁燕又成家藜思扶老堅堪杖庭中藜條高八尺許粗如竹萱解忘憂晚尙花掃徑苔痕青入榻拓窗山影翠橫紗

卻憐衣上宵征雨欲曝中庭待日華

由師子園西望錘峯始知水經注孤石雲舉臨崖危峻
形容之妙爲賦一絕

千山合昏白雲封雲裏芙蓉露幾重不向師圍西面望那知石
挺是孤峯

八月五日夜雨

早眠不待見天星旅寢頻爲夜雨醒絕塞雲連千嶂黑近窗風
颭一鐙青蕭騷涼擁衾稠坐斷續聲和蟋蟀聽秋稼今季遲卻
好垂成豐澍幾番經

次韻題曠園

園爲鄂貝勒
熱河行邸

依光

行殿地原崇收拾餘波綺麗中羅帶一灣濡水曲畫屏
四面塞山宮雅歌自愜園林趣華轂都無許史風壁月正圓秋

壹齋集卷二十六

古

正好良宵莫遣酒杯空

嘉慶丁丑八月晦日

上幸阿濟克鳩大獵

召臣鉞

賜食觀圍並奉

命繪圖賦詩其上恭紀

我

皇纘武式舊典上塞年年事秋獮天闢圍場千里遙山作重關
互肩鍵溪林巨木任榮枯春獸秋禽自毳毼山莊八月顥氣清
大綏西指層崖轉狡騎驕嘶識艸香明駝爭圍知泉善前驅整
暇屬囊韉後隊纒紛按鷹犬自有藩王諸部從不煩六郡良家
選玲瓏山東小廔峪阿濟克鳩漢
語小廔峪蘿碧杉青路悠緬此是周陝

第九圍麇鹿由來最孽衍

詔許微臣

橐筆觀

賜食瓊廬荷

恩眎龍驤虎旅意氣豪紅樹青山畫圖展欲摹粉本目易迷

俯伏幔城豪屢吮乍窺人影闌山顛旋聽呼聲震崖巘須臾魚貫相屬聯倏忽林叢列峻嶒騎如雉堞山似城弓競彊弦箭爭撚兩翼飄搖爐白紅黃雲一簇中天卷斯時羣鹿正狂奔萬足飛空塵不踐竄伏俄驚陷脰僵突圍未見逾山免那暇呼羣相顧鳴惟餘吐舌偷殘喘昨者淡叢燼巨屨今茲攀石號乳贖金鎗一發椿其喉雪爪霜牙立時翦重馬馱來風尙腥汗血交流涇皎鬪

至尊一笑顧虞人暴者宜除惡宜捕臣聞成周蒐岐陽規格于

時猶未顯宣王中興賦車攻獵碣始劓史籀篆伊洛溼潤地幾

何準之當今直小腆子雲相如擅言語上林羽獵何膚淺浮夸

失實誤用心曷怪青蓮笑其褊李白大獵賦子雲相如競誇詞賦歷代以爲文雄莫敢詆訐臣

謂語其大畧竊或褊其用心何如我朝六合爲一家奔走名王足重繭獻

壹齋集卷二十六

五

壽交擊萬歲觴從禽爭拔金根輦校武羣希驃衛勳獲雋時蒙簪紱勉

習勞肆武柔遠人三善咸賅一舉葳惟媿丹青貌不工欲寫威稜才恨謏誰歟濡筆撰鴻文臣請摩崖別蒼蘚

經玲瓏山下作

丹里峯巒香靄閒焜黃老綠錦嫋嫋誰知絕塞烏桓地乃有南宗設色山

攬轡風前袖手藏忍寒貪看好山光尙嫌紅樹今年少榭葉千林未飽霜

伊遜河東食細鱗魚

卓歇伊遜平上秋風落葉初何圖木蘭塞重見菜花魚鱸魚初出者名

菜花魚曾於吳江舟中食之茲魚巨口重脣身有微斑酷似其狀在遠未諳餌忘機乃誤渠晚

餐輒停箸不敢當園蔬

半截塔

半截塔在齊爾博庫南約七八里有土堆似牆垣徑圓可里許中存一門低不可入門前後有碎琉璃瓦數堆色黃碧尚可辨塔大小二大者在土垣內門後稍東頂已圯小者在土垣外東則上截全圯矣門外有斷石一猶存鱗爪形爲龍爲螭不復可辨又數石上刻馬跡狀未審何用土垣外置礧碌二一完好一破碎矣按查初白和揆愷功半截塔歌未嘗言有二塔注但謂元某萬戶夫妻學道于此則此地當是佛寺遺址土垣外圯塔其萬戶夫妻埋骨處耶礧碌或當時寺外有田可耕耶今行者至此必剝取圯塔石灰爲金創藥又或稱爲元至元時所造殊無証據因卽所見成四絕句

壹齋集卷二十六

六

外塔頽然內僅存四圍尚有古牆垣不知題識誰經見賺得行人說至元

瓴甃崩摧剩劫灰依然雙峙傍層臺細吟初白詩中句似未親從塔下來

遺蹤依約像招提應是劉綱舊所棲爲按山門尋殿瓦分明幾簇碎琉瓈

誰解牽牛此佃田猶餘礧碌臥蒼烟于今塞艸黃如稻卻似當年刈熟天

甲戌冬何上舍

耿繩

招余及子卿小飲出示王教諭

芭

孫贈其尊人蘭士太守董文敏畫稿披覽不覺失笑乃

余在朱文正公浙江學幕中寫贈青浦廖閩者爾時子

卿同在幕中猶及見之上方尚有題句不知何時爲人
裁去流傳松江爲王君所得以其無款遂以爲董筆閱
三年耿繩乞書其事因題二絕句

書窗沈壁曾兒戲不料流傳誤弄藏卻笑孔融太輕忽虎賁那
得似中郎

孰爲董巨孰迂癡塗抹何曾目見之今日胸中有成竹惜無清
暇似當時

嘉平廿一日爲長孫

安桐

娶婦四兒

足民

寫棠上雙喜

爲壽因卽以爲戊寅歲朝圖蓋距立春僅八日耳

滿耳笙歌滿目花滿堂賓客笑言誰老夫也覺情懷好真是春
生娶婦家

壹齋集卷二十七

當塗 黃 鉞 左田

古今體詩六十四首 戊寅至庚辰

書曝書亭集後

博物研經世所知文章爾雅亦堪師誰知誤學先生者專讀風懷一首詩

天道盈虛測本難等閒莫作一般看會真記後身猶相竟奪先生七品官

少民南歸

送爾江南去鶯飛艸長初到家先上冢慰我早來書弟妹須身教親知勿簡疏卻憐歸亦客何地是吾廬

黃樓為子由自徐赴南京東坡送之出東門登城上覽

山川之勝云此地可作樓觀於是東坡始有改築之意

子由去之明日而河流至後河復樓成子由為作賦東坡以絹寫為六幅圖今碑刻在坡上者豈即其本歟嘉

慶戊寅二月二十日子卿太守因樓中竝祀子由子由為寶元二年己卯生茲樓之築實子由所卜地而太守

生年又與之同乃依前歲丙子壽東坡之例賦詩刻石

索和書此荅之

黃樓突兀徐東門始基頽濱之所卜築成為寄賦千言坡老手書圖六幅當時百日從兄游逍遙堂中纔信宿何期竝坐在樓頭七百年來聽雨足前年丙子坡生辰明年己卯壽頽濱連年

太守頗好事將母二老君前身况復生年正在卯早歲從師曾學道 子卿從先師朱文正公游得吐納之術 天資自昔和而清與我交游最為早

我亦明年開七表百不如人老何惜只餘一事似頴濱歸去鄉

園無住宅子由李方叔新宅詩我年七十無住宅雌甲辰大戊子富貴浮雲奚必

似昨聞太守禱雨雨滂沱家飽麥飯舞且歌能為父母即召杜

後賢豈讓前賢多可知愷悌神所勞但肯勤民無不報君不見

績溪亭子萬山中至今尚有來蘇號來蘇亭在績溪為子由築也

沈太守清任摹石田翁山水卷為阮刺史文肅同年題

太守字莘田號澹園杭州人

我觀石田西山秋色圖巨卷十丈牛腰巖縱橫老筆寫林壑昔

點大比城頭烏長歌自題何浩瀚大書卷尾當畫半昨從寶笈

得快觀祇今目想惟嗟讚阮公貽我畫一軸邀我題詩詩滿幅

因循插架已三年忽漫披圖認石田指摩老眼細詳審恰好丹

青人姓沈卻把莘田換石田筆蹤墨法蒼茫甚謂擬家藏石翁

壹齋集卷二十七

本雲白山青氣淡穩秋林紅壓釣魚船浮嵐翠溼眠雲枕沈公

觀察來江縣玉立長身我曾見到任涪翁即罷官抱書移主中

江院乾隆戊子己丑間沈曾任蕪關道緣事鐫級中江席煥復

幾時征帆又挂楚江湄但知使者兼山長誰識經師亦畫師五

十年來見遺墨幸我題詩人尚識不意紅塵眯目中重觀西山

好秋色知君兩世愛畫真是時沈在梓州為文肅尊公棠叔先生所作紙墨依然色

斬新他時譜史傳宗派好與東陽作替人

題趙舍人欽菊隱圖

分秧撥葉竹籬邊涼月清風自結緣怪底先生有僊骨一生長

對傳延年

不因高潔慕淵明手種黃花識性情卻被時賢誤推引頭銜新

換隱君名

題露筋祠禱冰圖爲陶給諫樹作

孟婆司風青女霜管領冰凌誰所當帝曰節媛此其職玉潔合
與冰爭光叢祠千載江淮重糧艘祠下分風送榜人正打回帆
搗雪屋濤山一宵凍岸上傳呼使者來千夫椎冰冰不開爲文
升香禱若應東風旗脚吹高桅須臾船行如碾玉依然萬頃玻
黎綠銜尾連檣次第過經旬盡渡黃河曲明年置臣合詞奏飛
輓頻年荷神佑

天子加封賜榜書丹堊重新煥崇構嘉慶丙子夏得旨封昭

貞我聞退之禱雲開衆峯東坡海市見於冬靈普惠之神並賜祠名

或言造物哀龍鍾須知二公遭逢時不利偶託詩歌作游戲卽

令山海鑿精誠無與民生與國計何如禱冰冰爲澌七省轉運

無愆期陳陳相因太倉粟使乎使乎真不辱

壹齋集卷二十七

三 戊寅十一月廿八日

恩賜禁中騎馬恭紀

天馬來西極年年貢 玉墀頻蒙仗下

賜又許禁中騎乙亥丙子伊犁將軍 貢馬臣拉蒙 賜 驗齒驚殊衆憐衰荷

曲慈徐行畏顛蹶攬轡媿權奇

己卯元日 太和殿宴歸書歲朝圖上

壽醮先開十日春 大廷躋濟百寮陳座中若有疑年者臣是

中朝第十人大學士明公年八十五協辦大學士吏尚戴公戶 尙景公兵尙和公刑尙崇公吳公工尙蘇公左都

御史穆公皆年七十 餘鉞亦今年七十矣

白髮尊前老孟光兒孫繞膝榮成行青氈便是傳家物金玉何

須要滿堂

目騎瘦馬出東華 恩恤衰庸齒漸加慙媿直歸無一事自斟

春酒看唐花

次韻錢侍講林盤山月下看杏花

松顛推上田盤月杏花欲化嫌山雪夜淡花月自相親那識行人嘆奇絕此時山客已早眠此境人閒卽是仙慙媿花時等閒負滿身塵土自年年

次韻奎學士照盤山月夜杏花

廿年五度到三盤恰值春林杏蕊攢自見漫山花爛漫始知淡巷句酸寒紅雲倒燭天疑曙碧月當空夜未闌輸與集賢諸侍從不辭衣冷盡情看

三月廿二日隨扈南海子避風海戶家戲題其壁

風卷擅廬不可棲
躔依海戶一椽低
石田茅屋平生願
惟欠春山雨一犁

壹齋集卷二十七

四

呼僮屋壁掃烟煤
艸艸題詩笑口開
留取舊聞徵故事
此閒是我避風臺

南海子新衙門延祐元年鐵獅

鬚獅幾度手摩挲
爐戶題名字未磨
一事怪他難鑄錯
濡豪惜不倩鷗波

寫出吞貔拉虎姿
何人體物賦新辭
梅邨樂府工無敵
卻與田家詠鐵獅

滄州殘蝕金陵遠
上元有地名鐵獅子衙相傳亦元時物
南北崢嶸僅有存
爭似

金猊屹相向
年年羽獵守宮門

半壁店望大房山

亂石艸橋閒潺潺
水一灣市聲半壁店
嵐影大房山目極流雲
淨心隨倦鳥還
何時尋六聘策杖恣躋攀

四月十二日偕和吉士

嵩漢

及弟衣大兒

初民

游崇效

寺看牡丹戲作

笑余頗似京城僧參禪宴坐百不能粥魚一響履聲動披衣不待雞鳴興惟餘一事遜渠樂栽花種竹連溝塍意渠未必果樂此欲招游者施金繒宣堊門南窠花寺繇英滿院紅霞烝兩年未到不關嬾三春扈蹕從朝

陵今年夏閏氣候晚歸裝纔卸經樓登丁香成陰海棠謝泉葉一碧如波激牡丹新妝恰端正成團胡蝶天香凝慈恩殷紅品絕妙太真卯酒嬌難勝氛氲似人衆香國照耀無盡千枝鐙裏回花畔不容醉戒律未免令人憎須知佛亦好米汁棒喝豈必儒冠懲蓮龕彌勒笑開口禪房畢囊空何曾

四月二十日香山直舍還澄懷園

《壹齋集卷二十七

五

罷直仍歸直匆匆五日閒新篁高出屋古柳綠如山未擬開尊醉先謀解榻閒落英紛滿眼無暇送春還

食筍齋前叢竹發筍廿餘竿

檣根舊種竹檀欒去歲添栽數十竿一昨春陰經雨足幾番纖筍出檐端平安不藉家人報愛護還同稚子看何日齋名真副實老饕竟得滿槃餐

檢戊辰山西行卷錄存四首

再宿虎亭

今俗作禡

崔生遇虎虎禡皮爲偕伉儷生兩兒重來覓皮復化虎虎亭名遂譌爲禡不知肇見漢書地志水經注上有虎亭下虎聚至今漳水流其南不比潞州已無潞吁嗟乎漳水湯湯亦非古挾石衝沙無定所聞說亭前水漲時六月灘聲正如虎

神池

邊牆缺鬻遠參差
麥平原綠故遲可
惜山城名不稱一
箇明鏡失神池
神池縣城西有池一湖旱潦不竭歲久為農民侵盜已就湮塞乾隆戊午知縣李謙蒙為疏濬溉田三百一十五畝有奇今又淤塞甚可惜也

自長子至高平作

弄季歸路經張店
準擬今春看牡丹
可惜來時花尚早
含苞猶

自恹春寒

張店真蓋廟有牡丹一叢高六七尺作花數十朵尚未放

四山雪淨莽春耕
飯罷肩輿倦眼明
松柏青青杏花白
長平里到高平

夏日園居雜詠

蝦蟆更歇東方白
池上肩輿里許長
抵得臨平蓮蕩路
荷花世

界柳絲鄉

臺齋集卷二十七

六

散朝歸自內書堂
時有宮花遠送香
如意門東大三昧
過橋流

水碧湯湯

退食褫衣食笥齋
閒庭雨過地生苔
忽經濃翠明人眼
帶露牽

牛一朵開

追涼獨臥北窗風
窈莫荷花廿載紅
何意簾櫳見紅裏
有人春

筍剝蓮蓬

園中二十年無孝春者近始有之

買魚沽酒不論錢
特為荷花作壽筵
我昨重來修故事
風流歇

絕十餘年

到門車馬絕風塵
鎮日溪堂几硯陳
未要辛勤誇曝直
簿書堆

案又何人

更無人與語連牀
直伴凋零半在亾
可笑老夫纔七十
此身已

作魯靈光

積雨園居家人報第三孫生喜賦

溼雲如倦客坐睡撼不醒清風若高人隱處費敦請自從入秋
來雨勢甚豪猛避漏移匡牀處溼墮簪井城垌隔音問曉夕盼
雲景遮眼但看書破悶惟潑茗家人報生孫慰我久延頸十年
未添丁是日恰逢丙因卽以命名庶幾副明炳喜氣返初晴老
懷爲一騁巡檐翫竹叢娟娟愈修整新筍已過牆又生十餘挺

次韻郝孝廉

臺魁

兩宿東石槽邨舍

七月二十日

荒邨難覓贊公房逃雨聊棲避漏牀

屋僅一榻

一室肯容元亮膝千

金誰問陸生裝

時隨扈者行裝皆未至

不須傾聽愁終夜卻惜豐收損萬

箱坐待雞鳴疑月出映門流水白生光

次韻度灤河橋

官橋臨上塞秋獮度河時急浪衝虹斷崩崖驅石危經營人力

壹齋集卷二十七

七

瘁瑟縮馬蹶知把燭成逾日誰題杜老詩

八月七日承暉山館作

山館經年別秋風吹又來情嗤三宿戀棲僅一枝纔稚柳陰加

密戎葵花尙開安牀吮吟筆不怕雨頻催

積雨泥成海驚湍渡斷橋都將行李滯難騁紫駟驕回首荒城

住愁心上塞遙

行李爲水所阻隨扈懷柔縣城四月

何期對明月把酒坐疏寮

旅居卽事

趨公天未明退直日過午閉門謝交游荒庭類老圃香葉沃以

光柳條柔若縷蓼花紅可憐菊蕊碧初吐青葱菜一畦冷岬蝶

交舞那復知塞垣恍惚歸吾土寄心偶足歡于時聊語語明月

照酒杯何者爲煩苦

所居近塵市浩浩千萬聲東家鷺鳴門西鄰器鏘鳴唱賣聲百

出一一物可名是心若盆水澄之終日清喧索不相干有如隔重城既無判牘勞敢廢炳燭明人生本逆旅底用分居行時還讀我書庶以全吾生

寄子卿徐州時河決蘭儀

此地與君別于今已五年秋風猶上塞濁浪又兼天城竝魚龍宅人誰買讓賢真成命分惡南望一悽然

趙姝像寺

道經梵宇憩行軒扈從晨歸師子園風鐸迎人如有語文姝高座默無言松陰滿地日初上菩提梯空路絕援猛記清涼舊游處流光已度十寒暄文姝塑像一依五臺姝像寺

寄二三兩兒

壹齋集卷二十七

八

青衿五男兒屢舉不得第官卷額二人科場有定制卽今全獲之尙遺兒及弟况復百人中文筆頗精銳以茲貪得心遂作分試計今年歸無資非關止者泥大兒本家督心爲米鹽繫季子避婦翁足民爲子卿婿子卿守徐州所屬人闡例當迴避阿完病留滯坐是壁上觀有若門自閉惟餘二三兒囊筆此戰藝昨朝試初場猛雨喜新霽文字知如何所願無障礙新妝荷端正何必慕時世得固足欣然失亦終必濟矯首雲間鴻專俟彎弓羿

八月十三夜灤河客舍與楊舍人鎮源郝孝廉臺魁對月小飲書寄初民兄弟

涼天佳月卽中秋東坡語言妙天下況際纖雲盡卷空未滿冰匳纔雨夜移牀就月蔬果陳瓶中幸有拋青春閉門底用覓他客對飲恰好成三人塞山萬里清如此碧玉巉巖照窗几自笑平生空好游未免此身在泥滓我欲提攜赤藤杖躡空飛步青

雲上瀛洲攬取玉膏來一醉應勝千日釀爲樂何須竹與絲中
年陶寫笑羲之好將今夕灤河月說與京師兒輩知

讀唐人小說感賦

繡服琵琶鄙右丞日華再放笑於陵那知塗注皆弁定李揆何
曾一字能

避暑山莊南書房作

塞山殘月正中天寢覺雞人未曙先睡美平生何處足紫陽山
館四三年

當年山水興方滋過眼鶯花遠幾時漸覺齊竽吹已澀欲將剩
錦乞邱遲

頻歲長楊扈屬車懷鉛握槩更囊書臣心猶有童心在未忘髡
髻上學初

壹齋集卷二十七

九

絕無人到榻常虛只有清風掃直廬貪戀

君恩不知老青鐙細字映窗書

柳下疎簾屋幾閒牆頭山色翠孱顏散朝車馬紛如織身與閒
雲自在還

承德平頂山與八溝近上多花艸有蛺蝶五色具備土
人于長夏撲而乾之鬻以充婦女首飾戲成二律

蘧蘧栩栩是耶非照眼仙衣五色輝不枉一生花底活依然萬
里癡中歸恥隨妝閣金錢化甘竝釵梁玉燕飛隣爾不從文豹

隱留皮徒欲媚閨幃

北戶錄鶴子艸春生雙蟲土人收於隘粉餉之脫爲蝶女子佩之如細鳥皮號媚蝶

己幸生從絕塞山無端撲取恣人看不知文宋誰先見遂使曉
巖避亦難天近霜寒應作繭春深花好莫成團輕盈殊覺風流

甚也學書蟬徹骨乾

十月十五日蒙 恩遣戶部左侍郎臣禧恩 頒到

御製養福增壽扁額一面銅佛一軀如意一柄珍翫九

事大緞宮綉各九端 賜臣鉞生日先是正月

上垂詢臣鉞年齒生日臣鉞奏云今年八月五日七十

上以是時臣鉞方扈從灤河 命移于

萬壽節後故拜茲 寵錫殊恩異數榮幸非常恭紀此

詩

帝增神筴六旬年 光遠微臣莫景延典禮新從秩宗後 壽

尊親捧

玉皇前臣鉞先於九月初八日拜禮部尚書之命十月

霞偏綺冷蕊先春花獨妍敬繹

天題披左氏福須自養節須堅

壹齋集卷二十七 十

大司農盧蔭溥前輩復得先世所藏瑞雪圖卷子屬題

珠還劍合事之偶楚弓楚得知誰某何如家傳畫卷二百年異

代依然落吾手君家先世侍御公歸隱南邨號病安花木曾開

尊水園法書名畫尋常有茲圖藏在啓禎小印朱文鈐卷首

籤題珍重付裝潢鑒賞傳觀示僚友定為宣和院體筆發自雲

西知白口曹秋岳溶有跋不知何日到長蘆大父官齋再題後

年復得之長蘆運使署中有跋越六十年今復歸將毋神物為

世守過眼雲烟去又還印泥鴻爪留仍久況經五世到鬻仍自

應十襲逾圭卣今季瑞雪喜連番開幘清光正三九是中林壑

足樵漁想見春明富花柳小閣人圍煨芋爐淡堂羣飲茅柴酒

凍觴鷗鴉兩岸聞玉山合沓千尋陡濟南風景似江南畫筆描

摹能肖否君如重關德水園我願先持除雪帚經營池館似圖

中標識牙籤排座右讀書看山不計年消寒痛飲奚論斗夏遣
仙官敕六丁通靈不許開廚走

嘉慶己卯冬十一月有 詔漢大臣年六十以上會賜
禁中騎馬者許肩輿入直恭紀

優老

聖恩覃肩輿顧影慙光榮逾賜杖安穩勝乘籃未敢逢人下須
妨離立參休忘奔走地筋力尙能堪

嘉慶庚辰春奉 命主試禮闈事竣示榜首陳繼昌及
諸進士

抗顏又復忝為師慙媿文衡五度持敢望精彊誇考閱不將虛
濫負 恩私花經灌溉開逾好楊中多山東甲子癸酉順天丙子諸科及視學山西所取士
魚自淡沉得乃奇幸免劉幾肆喧闐端由得失寸心知

壹齋集卷二十七

十一

羽箭森巖麗景暄

君王策士曉臨軒文章上應魁三象城闕喧傳孟四元金孟宗

第一及府試省試廷試皆第一時號孟四元今科狀元陳繼昌以癸酉科本省鄉試第一中本科會元其童試亦以第一名入學
故相清芬流後裔繼昌為故大學士陳文恭公宏謀元孫 太平盛事重詞垣兩

朝四十年重見好續羣書紀

聖言乾隆辛丑科錢榮以三元及第高宗有御殿傳臚詩今上恭依元韻有書香傳世德詩韻闡先言之句真異

也

填溢都門聳眾觀聲華豈僅勵儒冠階榮紫綬金章易報稱

君恩祖德難珍重許身如稷契從容披腹獻琅玕輝光照我尤

清切謬廁春官復考官

受舉酬知事本非得人職在貢 彤闈惟期桃李成秋實豈為

桑榆綯夕暉學術要從經籍蘊科名莫與事功違十洲總是羣

仙住未必蓬山景特希

午日園居對雨期趙舍人榮不至

新篁解蘂戎葵華秀野何減山人家衰年獨處苦岑宗佳節轉
憶兒孫講片雲西來黠庭戶待客飯期已過午呼僮洗酸泛茗
蒲移榻當窗看新雨

六月晦日劉吉士師陸招余偕祁編修篤藻田吉士嵩

年何孝廉耿繩崇效寺納涼次去年看牡丹韻

都門涼宇多歸僧與僧結夏夫誰能久思古寺暫逃暑恰來嘉
約歡然與山門綠暗樹如幄竹院紅溼花交媵頓遣平頭罷搖
扇儼離裸壤思叅繒自從五月苦炎熱如坐深甑遭炊烝有時
人夜大雷電疾風猛雨相憑陵朝來蘊隆略如昨日極禪閣無
由登何期四子有同契合并令我煩懷激惟餘知舉留憾事獨

靈齋集卷二十七 十一

遺表聖慙王凝今春主禮聞劉田牡丹作花事已往椒葉又落

情難勝是日浮生小聚類萍梗流光過眼如風燈夏涼寒燠眾

所願造物伊誰云愛憎浮瓜折藕且取適禪穢觸熱宜為懲試
披畫卷問朴老幾人來此招涼會寺僧藏盤山朴公青松紅杏
卷子 國初漁洋竹垞諸老

題者不下
百餘人

次韻吳太守雲同年見贈

于湖烟水劣能容慙媿苔磯釣者恭羨子一麾旋解綬休余廿
載未歸農才疏老負

新恩渥詩好情因舊雨濃最是寢同時洛誦警心何異五更鐘

平生頗解笑容容機汜雖衰敢釋恭與我周旋難任我若農力
穡不如農醉辭婪尾醒終易寒戀斜陽睡莫濃何日與君共歸

舫寒山真聽寺樓鐘

壹齋集卷二十七

三



蕪湖許文
澄深
重校刊

